

散
原
精
舍
詩

伯嚴詩余讀至數過嘗有越世高談自開戶牖之歎已酉
春始欲刊行又以稿本授余曰子其爲我擇而存之余雖
亦喜爲詩顧不能爲伯嚴之詩以爲如伯嚴者當於古人
中求之伯嚴乃以余爲後世之相知可以定其文者耶大
抵伯嚴之作至辛丑以後尤有不可一世之概源雖出於
魯直而莽蒼排奐之意態卓然大家未可列之江西社裏
也往有鉅公與余談詩務以清切爲主於當世詩流每有
張茂先我所不解之喻其說甚正然余竊疑詩之爲道殆
有未能以清切限之者世事萬變紛擾於外心緒百態騰
沸於內宮商不調而不能已於聲吐屬不巧而不能已於

辭若是者吾固知其有乖於清也思之來也無端則斷如
復斷亂如復亂者惡能使之盡合興之發也匪定則儵忽
無見愉悅無聞者惡能責以有說若是者吾固知其不期
於切也並世而有此作吾安得謂之非真詩也哉噫嘻微
伯嚴孰足以語此宣統元年五月鄭孝胥

散原精舍詩卷上

起光緒辛丑訖甲辰

義甯陳三

書感 以下辛丑

八駿西游問劫灰
關河中斷有餘哀
更聞謝朓誅鼃錯儘
覺求賢始郭隗
補袞經綸留草昧
干霄芽蘖滿蒿萊
飄零舊日巢堂燕
猶盼花時啄蕊回

黃知縣過談嘲以長句

首下尻高利走趨
初春麗日照泥塗
嗟君骯髒百僚底
過我恢疏一事無
撐腹詩書得窮餓
填胸婚嫁苦追呼
人間富貴換頭白
何處煮茶眠老夫

春夜觀兒童紙鐙戲游作

咆哮熊豹深山氣，曼衍魚龍鉅海風。
午夜喧騰初不惡，汝曹狡獪若爲功。
憶隨杖履瑤階上，同在承平醉眼中。
今昔茫然身老大，獨移簾燭泣殘紅。

寒花一首

狼籍寒花在酒筵，誰家消息好春邊。
夢迴泥潦魚蝦市，眼暗風煙鴻雁天。
蛛網井欄窺客散，繭絲歲月倚人憐。
江梅隄柳鳴騶路，肯映新晴爲我妍。

檢舊篋得熊鶴村光祿遺墨感題

九十老人揮手別，花飄雨斷歲華深。
初看對客有佳句，政

爾玩世忘機心文武道盡況今日死生大矣誰賞音獨公
提攜謂我好想得落筆從霑襟

人曰

尋常節物已心驚漸亂春愁不可名煮茗焚香數人日斷
笳哀角滿江城江湖意緒兼衰病牆壁公卿問死生倦觸
屏風夢鄉國逢迎千里鷓鴣聲

窗上見數蠅賦

惡風蝟蠶稼苗盡朔雪狐雄窟穴深汝獨薨薨弄寒日天
方慘慘許微吟汚塵自慣腥羶地揮塵還傷遲暮心萬里
春陰待花發蜜房如水莫飛尋

月夜

纖月亭亭履迹新
九霄風露在流塵
獨看樓閣還明滅
初有江湖屬隱淪
覆水年華燈下淚
改絃琴瑟鏡中人
閒情自愛機絲夜
惆悵牆梅報早春

移居

江南羈客身
僉父索得池亭
值幾錢
徑自攜家就佳處
不成辟世倍潛然
禽魚許識買鄰意
水石猶能照眼妍
片念微茫千劫換
一椽人海閱枯禪

尋龍蟠里顧石公學博不遇歸途作

日長山館舊相看
花暖樓臺人倚欄
那問金杯添野水
祇

餘白鳥浴春寒世間怪事向誰吐海外奇株應未殘

宅旁有臥

西明石
樹一株

畢竟仙居在人境斜陽簫鼓滿雲端

園居三首

夢寐吾何有方塘長短亭軒楹浮日澹草樹動春榮生物
閒閒見初衷皎皎醒世人那窺此影落蔣山青

禿柳猗猗在疏梅次第垂飛蟲晴照水啁雀晚移枝意興
隨年盡風光入座悲淹留一搔首物色付童兒

先公所豢鶴將入亦羈孤霄漢何曾近山邱如可呼迴廊
新月豔叢竹冷煙枯獨坐空朝暮啼殘返哺鳥
陳次亮戶部以去歲五月卒於京師追哭一首

亘古傷心勝不歸誰憐此士死長饑罪言杜牧伴狂廢遺

行東方世俗非下榻琴尊來舊夢買山徒侶泣先幾

周甲午二

月與君游區山料難瞑目烽煙外定有羈魂逐六飛

上元夜次申招坐小艇泛秦淮觀游

斗城含雨雲陰陰蜿蜒小流插千岑對坐野航待明月非

公好事誰見尋颯然一鐙入清深齒列樓閣四照臨鄰船

綵燭劇爛漫彈箏行炙翠袖斟東關水灣出荒遠露坐不

受野馬侵暗柳壞椽縛鬼魅寒鷗啼苦蒼煙林回望萬家

渺木末風至稍聞歌吹音爾我羈旅共節物向人但能結

舌瘡百憂千哀在家國激盪騷雅思荒淫世言古之傷心

者士有懷抱甯異今低頭篷底各量村平生四海子桑琴
夜闌茗飲倦罷去月出何處起猿吟

十六夜水軒看月

昨夜孤篷微雨寒窺人今肯近闌干一池春水明如鏡留
與江南兒女看

掩映霜痕深竹叢迷茫霧鬢畫樓東更堪玉笛關山上照
盡飄零處處鴻

春晴晚步塘外作

飯了晴雲壓女牆遲遲負手步橫塘水深魚樂客知否草
暖蜂游春未央野色侵尋惹衰髮夕陽杳靄生微涼何當

花發柳鶯啼一餉盤龍不入香

漫興

飽眼蒼鷹劈黃鸝鷺鷥啁啾乾鵲笑兀坐瑣廳不關渠萬
象縱橫初興到麥苗煮餅午枕餘禿枝篆窗晴讀書蠹尸
仙籍菌出虛古人糟粕今何如

開子春望示閨人

起死憐春在勤家了債無水明初浴鶴廊靜與懸蛛葉裏
親慙婢藤牀據衆雛簾櫳花氣暖牆鳥一相呼

見道旁菜畦春意盎然口占

韭甲蒜苗縱復橫清渠倒引白虹明游人指取春深處恰

略漸還三代非奢想君不見鄒魯大師冠峨峨希臘竺乾
應和多人治汚隆視寤歌別授要道甘譏訶天窮地變必
有待請聽慘惻啼湘娥世界健者知誰何

次韻答義門題近稿

蹈海攀天百不辭茫茫祇替後人悲遑論宿疾三年艾賸
誦繁霜十月詩號壁蟹蟲聊復爾負轅牛馬待憐誰湘纍
尙解酬漁父醒醉何曾到此時

次韻再答義門

陸沈几槩更何辭賸有人間澈骨悲聞說泥塗初悔禍可
堪謠俗與陳詩書傳屺上此人去錐處囊中相士誰苦撥

死灰話懷抱新亭雨泣恐多時

園居卽事次韻答義門

枝頭百舌巧言辭
闌入春風處處悲
初破杏花三日雨
半頽竹榻一家詩
灌園功狀癡兒竊
投老光陰知者誰
風景不殊煩舉目
迷離最是負當時

杏花用韓退之韻

昔步湖堂煙草空
兩廊日映酡顏紅
別院杏樹絕爛漫
羣鳥呼噪翻高風
當筵意氣狎儕輩
繞花百帀哦賞同
歲時雨露所濡養
豎子乃欲貪天功

武昌兩湖書院有杏花莊他處移植者昔年屢預游

舊爾來塵劫閱幻變
登山臨水淚眼中
寄命江南幾苟活

猥有園竹連深叢其間怒開杏六七霞光照耀霜林楓桃
梅辛夷迭環向春氣漫誕誰能窮平生攬物坐歎息千憂
萬恨天南東安得此花愜幽獨四海無人一禿翁
次韻和義門感近聞一首

誰云荼苦食梅酸誰覺屑亡覺齒寒累卵之危今至此兩
言而決恐皆難連雞形勢朝昏見搏兔工夫汗血乾元圃
瑤池何處所月明知戀鵲巢安

雨晴入後園尋春

淡泊曉風前光陰步步妍雜花香宿雨新葉養晴天波影
魚身亂樓臺鳥語圓呼兒坐芳草春色一相憐

王義門陶賓南兩塾師各有贈答之什次韻贅其後
二妙爭傳所吐辭高花大柳照淒悲自慚王謝栖游地卻
費歐梅倡和詩佳子弟何預人事好家居果屬伊誰去來
今有無窮世爲念薪傳胼熟時

次韻答賓南并示義門

日日吟成危苦辭更看花鳥亂餘悲閒來歲月吾喪我聖
處功夫書與詩如此江山相向老休論文字起衰誰江南
風景須公等看取園亭啜茗時

得熊季廉海上寄書言俄約警報用前韻

滿紙如聞嗚咽辭看看無語坐銜悲黃雲大海初來夢白

月高天自寫詩已向蒿萊成後死拚供刀俎尙逃誰癡兒
祇有傷春淚日灑瀛寰十二時

次韻答金大潤培金以醫名故有探丸之句

佩玉瓊琚放厥辭暫憑妙悟換深悲賺人花事可憐世有
客風流工說詩日飲無何醉鄉在探丸起死眼中誰揚塵
滄海彈指耳苦對鶯飛草長時

二月十日還南昌西山上塚取城北馳道至下關待船作
向夕雲霞嫋嫋生獨攜酸淚出春城連陂叢竹高橋暗十
里垂楊大道晴早晚樓船寒海氣東南形勝怒江聲鄉心
直與夜潮上白石青松喻此情

侵曉舟發金陵次韻答義門贈別並示同舍諸子

鐙影啼痕若可分時時魂繞社中粉客心起視大江水曉
色猶留鍾阜雲一萬年來無此日二三子肯定吾文煙波
鷗亂自成去著處天涯空念羣

江上三首

天漢迴槎了不聞祇來江上倚斜曛綠楊千里闌干外閒
數飛鴻篆白雲

宛入蜂房戶牖空龍旗猶自飽天風垂垂淚向春波盡江
北江南花影中

棧棧千峯電擲眼還我匡廬心所親懸瀑之巖猿叫處僧

牀冷月汝何人

江上讀王義門黃孟樂贈答詩因次韻寄和

黃侯一官號數奇挂頤蹶踵筋骨疲朝趨魚貫立馬廐暮
歸捫腹餘酸悲自言六載去鄉里母寄弟舍妻孥離競典

禪穉雜嘲罵

國家安用人才爲

侯爲某京卿以人才論薦用知縣發江南江

都王生好事者聞之嚙指交攢眉一旦二子相向笑有四
立壁無立錐但憑才雄出光怪各守孤叢如老羆搏翫船
窗愕且快狡獪百態形諸詩默禱江神謝二子驚貽騏驥
誰等差

由江入彭蠡次黃魯直宮亭湖韻

吾生有涯知無涯自分愚濁長終爾昊天震愆逢百罹歲
時往還復經此十年記語廬山僧登高眺遠留茅亭今日
扁舟入湖口可憐湖水濃於酒四迷洲渚浸渺冥羣鷗叢
雁紛相迎舉釣長竿諾已宿大波爲山風爲屋去去榆枋
逐卑飛白頭逃世此中歸胸置靈君剗城府難駕龍吟徧
處處青霄引我萬斛舟我百不如焉足羞獨有千秋萬歲
恨斟酌蓬蒿殉一邱

夜舟泊吳城

夜氣冥冥白煙絲窈窕青孤篷寒上月微浪穩移星鐙火
喧漁港滄桑換獨醒猶懷中興略聽角望湖亭

過樵舍爲明甯藩婁妃殉節處

樵舍風光聊可攀沈沈津鼓吏臨關至今涸鮒容泥滓祇
有輕鷗自往還終古英靈笑鄉井片時安穩看江山胸中
作惡萬端過爲借春雲照鬢顏

靖廬述哀詩五首

昏昏取舊途惘惘穿荒徑扶服靖廬中氣結淚已凝歲時
辟踊地空棺了不賸猶疑夢恍惚父臥辭視聽兒來撼父
牀萬喚不一應起視讀書帷蛛網銕相映庭除迹荒蕪顛
側盆與飯嗚呼父何之兒罪等梟獍終天作孤兒鬼神下
爲證

架屋爲層樓可以望西山咫尺吾母墓山勢與迴環龍鸞
自天翔象豹列班班靈氣散光采機牙森九關其上蕭仙
峯形態高且嫺兩如戴笠翁妍晴立妖嬈雲霞繚繞之光
翠迴面顏父顧而樂此日夕哦其間渺然遺萬物浩蕩遂
不還今來倚闌干惟有淚點斑

牆竹十數竿雜桃李杏梅牡丹紅躑躅胥父所手栽池蓮
夏可花棠梨爛漫開父在琉璃窗顏睡自徘徊有時羣松
影倒翠連古槐二鶴毳毼舞鳴雉漫驚猜其一羽化去瘞
之黃土堆父爲書塚碣爲詩弔蒿萊天乎兆不祥微鳥生
禍胎愴悵昨日事萬恨誰能裁

哀哉祭掃時上吾父母冢兒拜攜酒漿但有血淚而去歲
逢寒食諸孫到邱壘父尙健視履扶攜迭抱擁山花爲插
頭野徑逐洶洶墓門騎石獅幼者尤捷勇吾父睨之笑謂
若小雞竦驚飆吹幾何宿草同蒼茸有兒亦贅耳來去不
旋踵

憶從葬母辰父爲落一齒包裹置壙左預示同穴指埋石
鐫短章洞豁生死理孰意飽看山隔歲長已矣平生報
國心祇以來髻毀稱量遂一施堂堂待惇史維彼夸奪徒
浸淫壞天紀唐突蛟蛇宮陸沈不移晷朝夕履霜占九幽
益痛此兒今迫禍變苟活蒙愧恥顛倒明發情躑躅山川

美百哀咽松聲魂氣迷尺咫

由靖廬寄陳芟潭

凡二十年泰和丞天窮不死荒江微鬢鬚雪霜胸岷奇日
倚快閣但坐嘯衣裘污敝履決穿縫氈稱身訝奇妙鄉氓
指作賣卜翁又誤官舍呼僧廟廚乏蔬米躬灌園隸卒逃
亡鼠窺眇時摹金石詠江山亦用畫筆競炳耀結舌公堂
立木雞縣尹頷頤簿尉笑丞哉丞哉何許人澄海陳君老
非少自從君久懸僻壤吾亦轉徙如鷹鷂流傳文字一賞
之襟期涪翁有同調前年 朝政按黨錮父子幸得還耕
釣分應親故不相收萬口訾訾滿嘲諑獨君放船就游衍

感昔傷今談舌掉無何昊天示災凶坐使孤兒仆且叫昏
昏泣血西山廬奔忙重辱君臨弔尋聲索迹行哭悲助喪
成墳費量料先公賓客散九州君也風誼特清劭爾時北
亂逼京闕西巡方下哀痛詔臣民悔禍露機緘公卿陳
言仍竊剽君論時變究新法動得本根中窾竅提攜孤憤
到荒山更剖大義督不肖瑰才自合老卑冗安問蹭蹬失
津要今來榆柳換春風滿目川原坐孤隋雉鳴鴉啼朝暮
間思君罄顙渺雲嶠國憂家難正迷茫氣絕聲嘶誰救
療巖坳水涯明月空共君肝膽一來照

羅順循大令官定興以受代僅免團匪外兵之難冬間將

家避河南爲書上先公言禍變始末甚備蓋尙未及聞
先公之喪也發書哀感遂題其後

三千道路書初到百萬生靈汝尙存天發殺機應有說士
投東海更何冤破椽骨肉生還地殘燭文章慘澹痕哭向
九泉添一語舊時賓客在夷門

詠階前兩桂樹

靖廬階前兩桂樹分立東西好標格飽醺露雨搖春風掩
拂戶牖亂天色嫩枝舊葉能幾何低昂苦作深淺碧有鳥
飛上晝夜啼似憐先公親手植始移根幹有尺寸忽已枝
撐塞簷隙山中淹留憺忘歸往往看汝停酒食我來草木

都隔世祇許血淚灑牆壁當時辛苦澆花人亦復死去埋
廬側亂離憂患誰指數拂拭益傷孤且直直須頃刻吹作
花落取秋河洗胸臆

野望

春滿山如海飛鳴不自知雜花溫日影新柳長煙絲田水
聽蛙急吟樓過雁悲扶筇往來路寸寸淚痕滋

挽周伯晉編修

世人欲殺獨憐才喪亂思君倍可哀已作冥鴻掛贈繳自
然病驥蹶塵埃文章光怪布天下故事流傳辨劫灰忍聽
支牀哭先子尙搜遺篋過江來

得黃小魯書君臥病武昌
開先公因耗慟令搜篋

金爲附
小書寄焉

山行至冷水坑觀姻家卜葬處口占

碾徑柴車伊軋聲聞看麥隴據基枰一襟偃蹇雨鳩喚終
覺西山不世情

菜花黃白杜鵑紅鬢影疏斜深谷風我自尋源斷藤蔓鳳
味龍爪亂雲中

登樓望西山二首

天西南插大屏障落翠飛青入酒杯此日登樓有餘思牛
鳴雉响一徘徊蒼蒼雲霧夢魂處了了山川生死哀風光
萬花亂人眼獨聽鵲聲松柏堆

往者范生宿此樓日日面山如有求朝看萬馬自天下暮
覺雙鳳驚雲浮感時歎逝出文字搜幽覽怪誰匹儔至今
風雨關干上使我憑之雙淚流

夜雨

四山春漠漠一榻雨翻翻草暗蛙鳴檻鐙寒鼠齧垣深恩
猶几杖孤恨自朝昏月出墓門石應多蝸篆痕

寶甫領行在所轉運駐西安題寄二首

吾拚終天痛君猶報國心麻鞋攀狩輦板屋動哀吟老
死方無地安危況在今祇憐漢時月還照擣衣砧

關中仍轉餉天下已銷兵慟哭桑榆計低垂宵旰情唱

籌應寂寞填海有平生勿出豈儒語
朝端盡老成
雨晴墓道登望作

山居春氣寒況兼深夜雨侵晨亂晴光庭葉爛煙縷暖蜂
始轟游鶯鳩相間語墓門徑蜿蜒細步淚下土照天千萬
花紅白愈嬌吐衆山媚新沐嶼樹不可俯參差草木香渺
然此深阻靈德輝山川萬化正涵煦獨慮亦有託攀追與
終古回眼蕭仙峯飄雲何處所

別墓絕句

夜烏啼盡曉鷗閒日日松林煙岫間贏得九原念游子春
風吹淚溼西山

和孟樂城北道中感垂楊之作

駸駸車馬看騰馳始覺相逢老大時
頭白眼花身是贅日長煙暖夢如絲
門前貓犬都相識海內風塵問所之
信有垂楊能賺客道旁苦拂酒痕悲

熊季廉之上海酬別

眼中今有子海內竟何歸問道成孤往
憂天覺漸非江風懸涕淚花氣冷簾幃
世界龍父在看看滿夕暉

次韻黃知縣苦雨二首

掀海橫流誰比倫拍天又見漲痕新
東南災已數千里寂寞吟堪三兩人
坐付蛟鼉移窟宅祇餘鷗鵲叫城闌
陸沈

共有神州痛休問柴桑漉酒巾

据牀瞠目憂天下如此沈沈朝暮何八表同昏拚中酒餘
黎待盡況無禾空憐鱗鳳爲時出稍覺魚蝦亂眼多行念
浮生任漂泊瓦盆塵案日蹉跎

孟樂示述意一章託莊生齊物之旨發屈子天問之痛慰
薦今昔次韻感酬

低摧釭焰雨濛濛趺坐依然病榻中合眼河山占龍象生
心世界亂雞蟲迴環賢劫誰能證呼吸人天若可通畢竟
吾徒法應捨爐香度盡落花風

閔災

十日陰陰雨初知池漲喧杳冥陵地軸浩蕩沒天根石穴
魚兒上簾梢螻蟻尊闌不寄微命聊得一椽存

妖氛纏禹域淶水警堯年瞬息無乾土啼號救薄餽階除
晨覓騎城闕晚呼船寂寞揚雲宅深杯誰與傳

飛電動山川樓臺坐渺然瘡痍消息外寇盜夢魂邊勢欲
亡無日災仍降自天殘生餘血淚鵲灑祇青甌

偕孟樂訪次申觀察新居

賸作飄零江海人更堪怒漲歷昏晨蒼黃移寇炊仍熟徒
跣爭途哭尙新幸免爲魚還婦孺猶能放鴨閑比鄰人生
憂患無終始空肯看余守釣綸

喜晴一首

雨殘朝旭豔城端
傾市兒童拍手看
苦惹蛙聲滿煙水
乍來鶯語傍閑干
腐儒猶得窺天日
野老應爭祭肺肝
悔禍分明測穹昊
翻愁餘滴作奔湍

宿漲未消酷熱復熾
徹夜不寐有作

水宿疑單舸
炎宵忝短檠
打窗驚鷺影
到枕亂雞聲
冥想魂微細
憂端酒濁清
強支皮骨起
筋角散江城

過魏季詞隱居

先代文書燦日星
獨堪憔悴臥江亭
閉門自寫潛夫論
傳法兼參起世經
對酒看雲身老大
懷賢去國涕飄零
鳴鳩

亦覺隣牆便深語依稀月滿庭

題歐陽潤生觀察丈畫像

頤頤兀立七尺強豐頤廣頤雙瞳方雪髯飄裾松柏蒼吐
辭而折銳莫當大聲水上鐘鏗鏘翁笑指腹萬怪藏胡牀
踞坐氣龍虎九州人物相爾汝苦憶昔年補官處濱河壯
縣謠俗古翁爲區畫長兒女至今渠成歌召杜眼底江南
誰重輕強預時議參臺評類唾不顧俗物驚有如風霆夜
磕砭晴霄勁翻刷層城一語不合忤上卿拂衣歲月空靜
嶸翁亦提壺但自傾酒懷向客縱復橫先公石交今有幾
祇翁健飯常倒屣滿眼公卿可人否輒念先公涕如雨賤

子瞻翁南斗旁元精照耀髭戟張大材豫章映雲日積氣
溟渤涵汪洋老逢世變亦可傷獨抱元覽哦幾黃萬事休
置冰炭腸隨翁行藥匡山陽

伏日過李亦元刑部觀所藏京師攜出精藥本

國門自苦胡兵入天府菁英略散亡豈有遺書藏屋壁
虛從覆轍說滄桑公之好事勝懷寶坐使暗香生滿廊觸
熱摩挲一悲咤承平風物夢荒唐

集利涉橋水亭二首

寂歷東亭明夕輝短吟閒眺意多違賺來一片飛花地怡
是游人打槳歸

橋外樓臺絲柳長沒篙新漲浴鴛鴦貞元朝士還相見爲

汝聞歌泣數行

謂王佑題給諫李亦元刑部俱南返

月夜同次中恪士泛小舟尋秦淮盛漲

輕舟初恍惚亂水得回沿興逐青溪了愁移白月圓絃歌
風自落鷗鷺夜應眠細數逃亡屋蟬聲禿樹顛

辛丑七月登焦山作

觸熱貪巖壑行吟有輩儔雲濤番舶幻燈火市樓秋曉按
元戎隊風移斷角愁神山看一握憑汝狎奔流
斜徑槐榆影能爲高下涼潮音悲共語石氣暗噓廊杖履
依隨始嵐花寂寞香七年重到此彈指涕如漿

二客東溟秀

謂日本結城縣中村兼善

諧嬉俯急湍高歌下烏鵲落筆

照龍鸞座飽風雲氣筵張海國餐提攜付儒將兀對大江
寒

水北山人屋胎禽共不還藤蘿今古意雲物笑啼顏萬象
波瀾滅初衷魚鳥閒僧雛應識我巾屐好追攀

絕頂旌旗動防秋壁壘成巖空蛟作穴天險雁留聲俯仰
關憂樂迷茫雜雨晴山靈亦無語爲借濁醪傾

欄檻陰陰見風煙漠漠吹山仍周鼎重庵有魏碑支晚色
翻歸袂空天寫所悲江頭鐘磬寂去住果爲誰

北固山閣夜時日本結城琢中村兼善及李亦元陶渠林

俞恪士同游

怪底江聲亂沸蜩夢痕飄盡古今遙茲來結客海內外相
對憑欄天沈寥霄漢酒杯星自落樓臺石壁月初邀依然
笳鼓山川夜淚墮年年上下潮

竹林寺

去城幾許竹林寺探勝呼羣佳興同一徑柳陰雙鬢露萬
竿篁影四山風鵲呼樓殿靈巖裏雁盡川原殘照中坐看
枯僧供煮茗鐘聲吾與滅虛空

桃葉渡夜泛

嫋嫋柳邊棹離離月下人衣香迴一水酒思映千春初雁

明河見涼蟬畫閣新江南腸斷夜攜手竟誰陳

同李刑部錢拔貢雨花臺游眺

片片秋陰木葉聞閒攜野色立高墳亂山合處江濤白留
得新亭叫雁羣

萬家煙火蜂房似六代英靈驢背誰說法無人爭蹠血松

陰竹色國殤祠

山畔有李忠
壯臣典祠

第二泉邊嚙草新殘陽如水滿城園尋常虎踞龍蟠地獨
許尋秋三兩人

十八夜月上與次申移棹復成橋口占二首

青天蕩蕩大月在踞坐艇子隨晚潮乍入仙源萬楊柳鐘

山翠滴復成橋

風斷煙空橫夜吟溪光爲我成古今鳴蟲之野插南斗映
取雙雙世外心

秋日同李亦元刑部楊彥規薛次申兩觀察泛舟玄武湖
作

世稱玄武湖蒹蕩一都會兩載落江南趙趙未渠視嘉辰
秋景澄挾侶競聯轡綠楊包城郭潑眼亂晴翠呼船葭葦
叢孤掉夷然逝其時巨漲縮萬荷風破碎洲顯橢圓形泓
有斗落勢獨憐紅蓼花掩映容舫地俄頃出灣洄百雉明
煙際倒影浸鍾山天霄狎篷背日涵波氣香陶陶暖吾意

昔居奉旨詩集 一
水鳥化漁翁偃僂自相戲踟躕始噤近熟視復驚避野橋
步偃蹇柳徑遂通寺欄楯界虛無均堂芥誰置漫傾壺榼
餘幾擅魚稻利層樓納飛光千里颯涼吹空天蟠秋聲搖
颺松竹氣冥心治亂初搔首雲水外歸歟脫蝸角幽興造
端最更尋半山亭迷途折輿隸嗟公經國謨久爲世唾棄
孰通萬方略以復三代制時危緬遺蹤攀望獨垂涕回謝
鷗鷺羣斜陽戀執袂流塵一俯仰夢痕了難繪

靈谷寺

晴山吐氤氲幽徑引村塢初花爛漫香去郭快一覩稍轉
荒岡煙幾洗蒼林雨低昂映巖岑表裏豁棟戶由來巡輦

過尙肅遺構古一念却蟲沙四據氣龍虎摧落垣衣痕穿
漏日色午斜通禪榻深坐久風來語陰吹萬竹寒零葉秋
能舞流傳功德泉祈禱煩公府石燥泥亦乾龍去無處所
神物不自救但解澤下土誌公陳死人靈感偶然聚冥冥
影山川了了餘歎撫獨尋衰草歸殘陽倚鐘鼓

送李亦元刑部還京師

客底江南無不爲傾愁倒意幾人知空文自有枕中祕起
死甯堪帶下醫今日朝廷須至計後生口語亂餘悲天
心國脈分明在看汝飛騰足一夔

哭孟樂大令

壁鐙猶暗舊啼痕脫葉驚風一款門幾日覓君如有約行
吟和我已成窀依依寡母孤兒夢莽莽攀天蹈海魂轉慟
江湖容後死獨飄殘鬢看中原

過楊仁山居士聽說法

車馬喧馳道人天有寤歌初尋居士語烏鵲散庭柯大地
不知處萬靈相與過病爲衆生病已悟病維摩

雨

書劍園居嬾初聽秋雨長竹廊吟病葉桂塢漏新香飢鶴
還能舞潛魚亦自忙懷人江海斷鐙火訴寒蟄

丁叔雅戶部至白下頗勸貸錢營瀕海墾田旣去海上寄

此調之

憲也貧非病干卿風馬牛他年千畝漆餘事五湖舟眇眇
吾安放堂堂富可求時危徵卜式好作爛羊頭

與純常相見之明日遂偕尋莫愁湖至則樓館蕩沒巨浸
中僅存敗屋數椽而已悵然有作

別來歲月風雲改白日雷霆晦光彩乖龍掉尾掃九州擲
取桑田換滄海崎嶇九死復相見驚看各捫頭顛在旋出
涕淚說家國倔強世間欲何待江南九月秋草枯飯了攜
君莫愁湖煙沙漠漠城西隅巨浸汗漫沒菰蘆頽牆壞屋
挂朽株飄然艇子浮銀盃坐天地吟老夫四山眩轉眺

無極向日漁歌猶在側絕代佳人不可尋斜陽波面空顏
色千齡萬劫須臾耳吾心哀樂乃如此起趁寒鳥啼入城
回頭世外一杯水

過伯弢出示所藏舊札有詩志感次韻答之

盈盈帶水繞閒門看作烏啼溪上村中有歌聲出金石更
宜風葉與呼喧零綠細憶平生語暗燭能溫兒女魂那料
攜君供醉眼放鳶城闕幾人存

園夜和答姚叔節陶賓南

薜蘿在眼月窺門怪汝初尋紅樹村
畫壁蝸牛鐙自靜移
牀蟋蟀夜還喧噤吟已了秦庭客橘頌終傷楚些魂
莫面

雲山篤行李鴻濛原有槁梧存

十月十四夜飲秦淮酒樓聞陳梅生侍御袁叔與戶部述
出都遇亂事感賦

狼嗥豕突哭千門
濺血車茵處處村
敢幸生還攜客共
不辭爛漫聽歌喧
九州人物鎗前淚
一舸風波劫外魂
霜月闌干照頭白
天涯爲念舊恩存

遣興二首

九天蒼翮影寒門
肯挂炊煙榛棘村
正有江湖魚未膾
可堪簾几鵲來喧
嘯歌還了區中事
呼吸憑回紙上魂
我自成虧喻非指
筐牀芻豢爲誰存

刺繡無如倚市門區區思繞牧牛村晚移觴榼溪橋穩晨
聽簫車田水喧俯仰已迷蘭芷地伶俜餘弔屬鏤魂江長
海斷風雷寂陰識雄人草澤存

賓南伯弢皆有見和遣興之作掇此酬之

何人大嚼過屠門爲指初霜梅柳村天放湖山兼晚色陸
沈懷抱有孤喧居夷莫問乘桴事掌夢難招負石魂贏得
風流說江左新亭明滅謝墩存

東日本藤澤元

三山才隔一重門笑認鴉飛不到村獨抱楹書明絕學

父君

爲大
名儲版

來探國論謝羣喧驚猜豺虎恐陵地收拾蟲沙慘

澹魂更有卮言名弔詭轉桑十日可長存

寄肯堂

拘怒橫流束一門憑誰疏引灌千村公知吾意亦何有道
在人羣更不喧碌碌已窮臆鼠技姝姝欲併蠶魚魂癡兒
種海求甌脫任被麻姑目笑存

返西山墓廬將過匡山賦別

謝客談經隱石門陶公采菊杖南村蒼茫余亦自茲去九
道江流相與喧楓落舟帆明戶牖松吹雲氣合精魂孤兒
猶認啼鵲路早晚西山萬念存

江行雜感五首

暮出北郭門蹴蹋萬柳影載此歲晏悲往泝大江永濤濶
翻星芒龍魚戛然警峨鰲掀天颯萬怪伺俄頃中宵鐙火
輝有涕如縻縷膠漆平生心撼碎那復整人國所仇恥曾
不一瞥省猥就羈散儔啁啾引吭頸低屋難甕盎日月留
耿耿睨之雲水間吾生固飄梗

千巖秀雲扃兀坐無儔匹浩漭漭濊中目短歸鳥疾乾坤
仍端倪蓄念詎敢必支撐四維張天陽豁蓬華鞭頑珣萬
塗誘進綜一術學道基小人政化至纖悉芽萌可怒生涵
濡俟其實所恐墮冥叢蕪穢虧素質又如繫朽株弛裂不
終日大音戀橐籥後生欲何述空咤金日碑煌煌功漢室

天有所不覆地有所不親汝不自定命天地矧不仁猛虎
摔汝頭熊豹糜汝身蹴裂汝腸胃咋喉及鬪脣長鯨掉尾
來睽睽齒磷峒汝骨爲灰埃汝血波天津吁嗟汝何有道
在起因循大哉生人器千聖挈其真靈氣赴取之活汝頻
與呻媛媛而睢睢永卽萬鬼鄰躑躅荒江上泣涕以霑巾
往者江湖災歎極東南陬泛濫百郡國鼉鼉撞天浮席卷
其井閭耄弱葬洪流牛犬枕藉下骸骼撐不收至今寒潦
清庭呻散汀洲司牧頗仰屋四出煩追搜取以實強鄰金
繪結綱繆 天王狩安歸誰復爲汝憂茫茫撫時屯擾擾
焚道謀民義湮大原儒服尸瑣猷奄忽元氣敗造物懸決

疣

入湖對匡山巉巖界江壁松蘿垂蛟蛇吼浪氣上擊結輩
四五人攀游尙歷歷歌吟以飄殘光景不可覓一人掀虬
髯守郡誓報國一人長安歸埃風瘁顏色二人百僚底
眇眇刷翩翼其一死闕下凶亂見藏逼孤生何俛俛餘
喘伏豚竝提攜萬坎恨溢作中夜泣靈怪迴我腸八極有
予立猿挂到天藤昏鴉噪而入嗚呼世變大終侍五老側
長至抵靖廬上塚
已掃層嵐入初驚宿草長親顏支寤寐兒氣冷山岡飛雉
銜松色黏蝸溼蘚香紙灰颺淚盡天照一杯漿

翠華終自返碧血更誰鄰萬恨成殘歲餘生看負薪子孫
身外物今古墓旁人爲解冥冥意烏啼霜露晨

靖廬書所見

西山江之濱包裹四百里岡巒支脈分錯出鬬俶詭高者
插天霄騰翼鵬鷺似稍伏奔虎象忽蹙蛇龍起吾家所結
廬厥卜蕭峯趾徐迤爲平原隴陌映錦綺村舍可相望煙
火略櫛比奈何託膏腴而不自經紀山有濯濯姿叨涓涓
涓水沓莽疇畝間豺獸迹填委博塞以嬉游蓋多情農矣
婦嫗棄紡織不握絲與臬衣襦決臂肘垢蝨冒愧恥小兒
益無藝顛倒踢泥滓朝探雉鵲穀暮拾豬牛矢日縛一束

薪那救中腸餒閒窺其室閭圉厠偪牀第蠹甕倒瓦盆羹
糝冷甌錡羶風煽溷濁嗟汝畢老死先公滋憫焉曰有說
於此填地墾榛蕪盡付勸耒耜雜植桑竹茶薯芋杉梗梓
禁約彼盜採稠疊獎生理科條稍區別一瞑悼天只至今
連頓呻未遂脫瘡痍嚙暮鄰翁來感歎既有以指畫松楸
間首顙口亦哆低摧縱語翁營魄猶尋咫尺夙昔所施設蔑
不究本始況當 聖政初萬情費量揣撥亂加綢繆孤蹈
擺譽毀造次省民艱若疾痛在體引繩喻仁術鱗爪一毛
耳翁復扶杖言此鄉竟何恃昨歲備枯旱今歲困渺瀰昨
旦急箕斂今旦刮骨髓側聞苛告身輸絹額有泚又聞歎

議成糾取充賕賄官家至是邪瑣屑挂牙齒翁退背鐙坐
淚墮不可止民有智力德昊穹錫厥美振厲掖進之所由
奠墓址列邦用圖存羣治抉癰痞雄強非偶然富教耀歷
史孰尸化育權坐令儕犬豕一漚知滔天一塵測蝦蟇撫
一蟻蛭區以驗俗根柢鹵莽極陵夷種族且數圯天道劣
者敗中夜起拊髀體國始經野歌以俟君子

月夜步墓上野望

飄飄新月見曖曖衆山寒枯草眠煙薄疎松夾鬢殘歲時
存獨夜魂影弄歸翰四野蟲聲去蕭峰不忍看

嶠廬雨坐

昨夜千山明月寒晨起一椽過疏雨牆頭綠竹青松林猶
覺風吟落蟲語鄰舍炊煙雞犬鄉鄰舍豎子鑊柄長高樓
了了讀書眼死生獨坐涕淋浪

讀漢書蓋寬饒列傳聊短述

五帝官天下傳賢賢君權韓氏爲易傳大誼明其然次公
稱引之摩切世主前酒狂中感激道窺天地先當時坐大
逆大辟遂加焉擬以萌求禪列剖無由緣自剄北闕下衆
庶莫不憐千載去寥寥迂怪誰復傳激昂鄒昌頌排壘王
生篇議者執金吾今則譽汝賢

雨中題峭廬壁

啼鳥已放忽忽去寒雁猶看冉冉東誰念山中三日雨牆
梅吐萼瓦盆空

西山遊屐草煙荒祇飽松聲百道長可似涪翁臥雙井吟

魂破碎永思堂

永思堂在雙井
涪翁先墓側

雪晴放舟題寄南昌樂羣學舍諸子

西山雪壓東湖隅一夕凍合玻璃盂我來園坐青氍毹嘉
二三子爭啣濡筍蒲煮酒膾腹腴羹葦薑橙餉雞蘇抗辨
域外窮譎觚深鐙夢寐聞醉呼尋常不忍問鄉國今瞥英
少森階除光怪擎騰虎豹氣文采煥爛鴛鴦雛插架琳瑯
百國書旁行文字相于喁妙道要指如貫珠立百世下足

起予自來策邦聘雄圖蠹朽者去榮者扶匯海浩漭導涓
滴參天輪囷視根株萬方鉅子目唯盱人極公例可灌輸
挈取業智開典謨攀天而舞立懦夫要須鞭頑勿驚愚相
悅以解徐竢諸千里一蹶猶痛痛汝太早計莊所吁陰陽
消息道之樞侵晨劇別心踟躕晴江臥看萬象徂老矣坐
使淚眼枯題寄得無哂區區

孤塘夜泊和酬公湛見贈

江鄉挂眼二三子珠樹琪花初歲年儘飽風香寫寥闊獨
迴襟抱解哀憐吟餘几案鬼神下夢破鴻濛日月懸白髮
扁舟一相憶關津臥聽鼓填填

曉抵九江作

藏舟夜半負之去搖兀江湖便可憐
合眼風濤移枕上撫膺家國逼鐙前
鼙聲鄰榻添雷吼曙色孤篷漏日妍
咫尺琵琶亭畔客起看啼雁萬峰頭

湓城謁壺天遯叟隱廬

一老廬峰下巖巖拄杖尊天人
涵藁籥仙聖見根原
支刼悲兼大觀生
息若存拜牀虛室白
至道混無門

先世稱三子歸然惟有公
憫孤商片石遺興嘯清風
餘地游蒙叟丹房駐葛翁
須臾進履去魂繞大江空

舟夜口號

風邪潮邪斷續聲山邪雲邪天外橫電火滿船大江白中
有一人涕交纓

拒糧胡麻以爲餌下聽流水鳴淙淙鯤鯨那得遂膾汝欲
擲長竿驚小龍

舟次安慶遇吳文鹿觀察同年

鎧色江聲萬口譁竿旒飛影動龍蛇殘宵邂逅成來去早
歲聲名了歎嗟白眼看人欲安往深杯閱世與無涯夢醒
覓取憑欄語只有羣鷗接浪花

吳董卿大令在揚州見余近句有詩相及賦此酬之
寫憂齷齪拈吟筆偶爾流傳江海間猥損新篇從詠歎早

支幽抱看人寰霜懸亭館初相見席卷英豪未可攀世亂
空文忝吾輩嗟君雙鬢亦淒閒

日本故相菅原道真建祠大坂曰天滿宮有神松枯而復
活今東歷三月值其邦人舉千年之祀而老儒藤澤南
岳乃爲徵詠因賦二首

以下壬寅

蛇龍偃蹇與摩挲咫尺風雷奈汝何留得榑桑初日在高
枝倒影海如螺

呼牛應馬更誰同一笑三山吾欲東寥廓千年蛻蟬處童
童祠樹換春風

題顧石公松花江踏雪尋詩圖卷子

江南酒徒野狐禪氣可食牛握兩拳皤皤之腹高頰權咄
嗟白眼橫青天撐腸文字鬪怪妍笥束行卷世已傳高名
老學孰後先時時興酣跨四筵滿堂賓客噤寒蟬天放渴
鯨吸九川天矯揮斥兀迴旋金觥擲地聲鏗然踞坐謾罵
口流涎爾曹耳語值一錢老郎博士誰敢賢餘子瑣屑污
吾氎望風避席竄僚員小儒瑟縮乞執鞭愈益大笑摩其
顛一旦去家羈窮邊榆塞萬柳見纖穿債帥府主相攀牽
朝講騎射暮屯田旌旄千里蔽風煙蛟魚噴沫豺虎連胸
茹萬古泣漚漣獨往江頭尋酒船飛雪峨峨迷歸年至今
浩漭千百篇榮光瑞蹟留連蜚瞬息變滅夔憐蛇山河大

地獨醉眠照映此圖蟠龍洲春風吹夢啼杜鵑

春晴同江叔濟太守繆筱珊編修歐陽笠儕觀察汎丹青

溪看桃花吳董卿大令有詩紀興次韻報之

初桃白日爭妍華夾岸十里鋪晴霞
拏舟澹蕩柳絲外面
面闌干迎鬢斜
流雲賸照烏啄屋
喧風已亂蜂排衙
探頭
曠野興孤絕
各挈寸抱包荒遐
鍾山低昂驢背上
飛光潑
翠攀無涯
繖花燭天弄溪水
百重倒影浮金沙
曬網無人
鷓鴣臥枕尾
犬吠三兩家
鄰船吳令亦狡獪
坐倚紅袖嘈
箏琶瀟瀟暮雨自清絕
恍如煙際轟綠車
吾儕儒生坐自
失萬象掠眼餘歎嗟
王侯螻蟻定何物
有命歸賣東陵瓜

還期頽睡淨塵土捉塵僧牀烹揀芽

同叔澥筱珊登掃葉樓歸訪薛廬顧石公遂攜石公及梁
公約過隨園故址用前韻

朝興漱齒汲井華屋角已滿潏豔霞火急攜客到山麓新
竹高檐相向斜掃葉樓頭萬綠合大江雁去呼衙衙擎杯
自了湖海外今古在眼余心遐還尋詩翁山水窟潭魚可
釣垂楊涯命酒瞠目不敢飲卻羨有飯蒸成沙須臾翁亦
跨驢出攀條穿徑迷田家隨園老人舊吟處臺榭想像傳
琵琶自從兵戈閱百歲問字客散無停車荒邱亂塚牧兒
下萬事不保惟長嗟況今世變幻蒼狗屢聞竊國如分瓜

公等休矣各歸去臥看殘陽明荻芽

次韻再答董卿

突兀埃塵絲鬢華吐氣恍接千林霞一水盈盈便酒舫坐
看東風飄燕斜董卿聽鼓百僚底好事頗慕古押衙耽吟
賭醉費晷景興到邈若孤雲遐我早支離嗤匠石會從問
難窺津涯垂頭草莽妄憂國痛哭反欲追長沙方今人才
滿廊廟可有寸效張官家四座無言星斗白獨訴抑塞哀
銅琶更念匡山幽絕處初設條例苛行車還鄉寄命兩狼
狙作計付與旁人嗟夢笑世外湘綺叟獻賦公嘲哈密瓜
安得置之江山上整齊騷雅蘄萌芽

余寓園經去歲積漲花木盡萎獨海棠數小株盛開感賦
往者淫霖爲禍災三尺漲潦埋蒿萊園居几榻隔濤浪魚
鼈戢戢嬉高臺嘉卉壞木盡爛死蝕入地底彊根荻其間
大杏六七樹花時爛漫頰霞堆鶯鵲狂翻賓侶讚日繞百
帀傾金疊祇今兀立枝幹禿生意剝洩纏殷雷亦有千竿
作叢竹隕葉漫誕連莓苔桑槐梨棗慣滿望龍蛇之阨隨
摧頽嫣然春色斷不盡海棠三兩偏繇開垂絲細朶鬬嫵
媚瓔珞珠蕊明瓊瑰朽株槎枒若喪我獨映紅紫籠纖埃
飛尋蜂蝶無意緒咫尺光景從驚猜世間萬事換窠臼盛
衰榮落誰論哉猥抱愚昧測蒼帝而曰傾覆栽者培戕殺

肆虐豈有擇汝偶不死遺牆隈長養雨露冒恩澤玲瓏欄
楯遮靈胎至人玩物通造化春際天地還生哀魂翻眼倒
呼豎子爲我赤脚移遠梅

題彭菽齋關中詩冊

獨餘慷慨悲歌氣來繞秦關百二重雁塔新題天作壁驢
宮殘浴夜聞鐘帝王寇盜供彈指河嶽雲雷盪此胸挽輅
建瓴還一笑傳經心事想雍容

黃小魯觀察游西湖歸過訪攜虎跑泉相餉賦此報謝
黃侯厭官端學道莽莽長髯怒春草築屋江頭虛釣竿咨
嗟拚向西湖老一舸箭激不過我快攫雲嵐滿懷抱湧金

門外頗黎盆手搖大扇落晴昊三潭菱荷甲天下笑面孤
山作蓮島搜幽攬怪吟大句十日游尋迹如掃帽屐風流
爪鬚存遮邀頓被官長惱腐腸羹芻列冠珮顰蹙逃去真
絕倒臨別汲得虎跑泉載以大甕撥萍藻櫻心生死齊物
論始覺親朋無醜好公然乘興訪安道白水盟衷嘲栲栳
余猶屈曲自世間踴躍開緘救吻燥祇憐畫舫眠食地廿
年殘夢啼鶯了滿眼人才投濁流家國算餘談舌掉楫櫓
還煨雙井茶坐想涪翁於物表公歸莫更睡松風心齋換
取兩鬢皓

園夜

涼色滿天界微風初善予竹梢星淡淡荷底月如孤盞
千齡在零愁萬籟噓流螢逐明滅俯仰儻關渠

園中蜀葵諺名龍船花雜開甚盛偶賦

亂眼甯知有此花牆根砌罅列如麻明霞萬片烏啄影暖
日一簾蜂打衙破碎風光還自舞低迷樓館坐相遮夕陽
葵藿與愁絕獨看雲霄溼露華

喬茂菱員外樹枏戊戌初春到長沙別五年矣頃奉使出
游武昌還過金陵遂復入都賦贈二首

承平今日還相見流轉江南何所哀萬國風雷懸肘腋一
尊夢寐看池臺魯連曾自園城出土季甯爲佐鍛來一泣

一歌都隔世憑君仍問救時才

聞道朝端諷臥薪緇塵幾見吐車茵輪囷肝膽誰與語從
此頭顱不借人匠石低徊過櫟社仙槎恍惚隔天津要知
聚訟安危外神武門高岸幅巾

池荷

嫋嫋池塘紅白花烘晴搖雨幾枝斜蜻蜓掠過魚兒躍初
放秋光明晚霞

立武湖邊打槳看莫愁湖裏和歌殘門前儘有花如海笑
喚雛鬟一倚欄

黃公度京卿由海南入境廬寄書并附近詩感賦

天荒地變吾仍在花冷山深汝奈何
萬里書疑隨雁鴛幾年夢欲飽蛟鼉
孤吟自媚空階夜殘淚猶翻大海波
誰信鐘聲隔人境還分新月到巖阿

雨過

雨過涼人意清深茗坐留園葵空抱日
砌竹暗來秋天物閒仍競吾生倏若浮
成虧在阿堵甯用濁醪求

閨夜有作

花樹絡緯聲風飄更接城酒杯吾自老
荷沼月初平蝠亂斜河影烏銜隔夜晴
閒襟待霜露始念百無成

中秋夜同肯堂詰甫恪士汎丹青溪渠
林次申亦各攜妓

至遂登復成橋步月次肯堂韻

黃簾之舫橫溪風綺樓復閣長煙籠客心正悲焉所窮老
去無復酖顏紅誰懸大月輝天東萬柳橋頭視濛濛當襟
鍾阜爭塊雄飛光倒景驚化工俄頃響柂星搖空泊集洲
渚如鵝鴻聲者暫者雜疲癯還聞雛鬢喚人叢翺翔馳道
笑語融蟲聲四野答未終翩然弄影墟墓中躑躅掩泣波
雙瞳君不見古來歌吹江山上閱盡鷗羣坐釣翁
中秋夜攜客棹舟青溪看月獨江叔濟從監臨使者入試
院不獲與游後二日承示是夜所作次韻答之
青溪艇子中秋月咫尺佳人隔此游獨向風簾官燭下臥

聽虬蛩萬蟲秋 祖宗恩澤仍多士旦暮承平更百憂爲

想煎茶伴歐九應吟殘夜水明樓

金陵試院在秦淮側

渠林五十生日賦贈六首

初憶逢君蛻宅邊

長沙周氏故宅即唐劉蛻宅

瓊琚玉佩接華筵江南

再見垂垂老各撫頭顱五十年

曾聽鳴鏑天山下更看飛鷹黑海西叱咤風雲七萬里閒

來肝膈自提攜

方丈蓬萊了可攀樓船持節氣如山神丹受得青童祕散

落人間只等閒

滔天禍水龍蛇動插血盟言雞犬安畢竟功成不受賞後

人端作魯連看

朱家郡國尊游俠杜牧平生有罪言一二流傳在天地酒
酣耳熱與誰論

餘事還驚世上兒倒流江海澱霜髭英雄自有無窮世起
看瀛寰舉一卮

肯堂爲我錄其甲午客天津中秋玩月之作誦之歎絕蘇
黃而下無此奇矣用前韻奉報

吾生恨晚生千歲不與蘇黃數子游得有斯人力復古公
然高詠氣橫秋深杯猶惜長談地大月難窺澈骨憂曠望
心期對江水爲君灑涕憶南樓

日本嘉納治五郎以考察中國學務來江南既宴集陸師
學堂感而有贈

國家喪敗餘頗復議新政仍遵今皇謨
嘒嘒誦甲令四海學校昌教育在釐正
所恨益紛龐末由基大命去聖日久
遠終古一陷非禮樂壞不修侈口囓
孔孟譬彼涉汪洋航筏失導迎盲僥
拊胸憤曠莽欲何聘陶鑄堯舜誰多
算有借鏡東瀛屑齒邦泱泱大風盛
亦欲煦濡我挾以禦物競羣士忽奔
湊有若細流迸觥觥嘉納君人倫煥
斗柄創設師範章捷速日還併歸置
游釣地瞬息變謳詠起死海外方撫
汝支那病頃者翩來游蓄念摯且勁
蹤迹北而南王

公徧造請聯袂金陵城須眉柳月映雍容貌儒者頓使增
歎敬朋侶二三輩冠服盡明靚晶天蟲鳥絕酒坐龍虎橫
劍珮冷無聲深堂步寥曠歷觀我鬢舍根柢析究竟瞠目
不能答頭汗羞脅營君既洞澈結反擬施括縈色下語益
純孰云雜嘲評余乃執爵興種禍豈能更誘掖振厲之先
覺順其性大同無町畦天人互相慶欬歔立歧路仰視纖
雲淨持此謝嘉賓且以證後聖

叔海旣出鎖院將於明日取滬至姑蘇乃會飲河亭爲別
次韻調之

風流爲客肯置酒告我去之江海游一喙兩肩無長物淺

斟低唱送殘秋滄桑只易尋常醉魂夢猶纏寇盜憂倚徧
旌幢好相憶飛鴻影盡綠楊樓

余石蓀郡守年丈由松江移知揚州奉贈之官

白髮童顏一丈人三年報最海之濱初看大郡魚鹽盛每
數先朝涕淚新蘇飲尙餘燕市氣詠懷好對曲江春從
知儒吏關風俗儻許狂奴謁後塵

徐先生宗亮蕭先生穆偕過寓廬作

桐城二老古須眉安步扶鳩任所之漫就我談排闥入更
無人解過江誰天雲閑濤明殘唾文字聲香散古悲世亂
爲儒賤塵土眼高四海命如絲

秋旱得雨偶成

冉冉秋晴零葉乾
乍能微雨弄新寒
游鯈荷底穿泥見
叢鵲蘿陰啄屋殘
腰脚漸堪甦氣候
鬢毛初惜對杯盤
門前盡日聽鈴馱
兀有閒愁一倚欄

夜讀鄭蘇龜同年新刊海藏樓詩卷感題

花時月夜放觥船
每過濠堂一惘然
安穩溪山人竟去
低垂藤竹晚猶妍
新吟掩抑能盟我
此士浮沈莫問天
便欲埋頭聽鼠齧
殘鐙塵几不知年

用門存韻寄和黎薇生郎中并示譚組安破戒綴此後不復徇爲之矣

草玄漫許隱黃門
齷齪看傭賣餅卹
好佩瓊琚念孤子
自依鐙火問豚喧
浩園蟲鳥殘僧句
大陸龍蛇望帝魂
賭酒忽忽過十載
蘭苕翡翠眼中存

譚生談藝亦多門
環裏千卹與萬卹
二士風流古宜有一

尊夷夏暫無喧

謂已結辰
州致衆

大波橫雁洞庭雨
獨樹鳴蜩枉

渚魂披髮自尋眠
食地閒來雙槳爲誰存

後園晚步

照眼蒿蘆枯作薪
寒塘千步躍魚鱗
殘霞欲挂月鉤自卻
有垂楊解向人

隱隱砧聲落葉聲
晚風牆角自淒清
閒吟剛在啼鳥外
銜

去江城一片晴

題松江提督記室雲韶詩冊

騰騰已有食牛氣渺渺翻成別鶴詞
拚向江湖矜爪觜幾經烽火照心脾
吾衰那解商文字世難方看傍節麾
遙夜一編更惆悵吟人長遣在天涯

題張季直荷鉏小照

許行學派開天下振古無人識緒餘
獨契微言張季子昇平持世一耰鉏

聖牧經綸世已傳爭看溷海佩烏健
等閒覓食蛟鼉側儻爲余留二頃田

園館雨坐感事作

亂葉飛翻風滿臺啼鳥祇在女牆隈
新霜又換江南色小雨初閒檻外杯
不信煙雲終變滅可能鐘鼓與徘徊
殘年錯恨秋光老重認垂垂一樹梅

壬寅長至抵靖廬謁墓

天乎有此廬我拂蒼松入壁色滿斜陽
照照孤兒泣登樓望高墳微醉草木氣
一片好山川冥然接寤寐幾日酌春風
兒歸又長至荒茫五洲間餘此呼籲地
國家許大事長跼難具陳端傷幽獨懷
千山與嶙峋貧是吾家物甯敢失墜之
江南可憐月遂爲兒所私

大孫繩東溟諸孫解西史三齡稚曾孫伊嚶學兄語

小立風滿山默禱淚如瀉萬古落心頭仍臥嵒廬夜

芟潭枉過嵒廬賦贈二首

百里松楸晚搖搖看汝來一官皮骨在萬念死生哀往事
烏啼了行歌牛背纔西山好顏色吹翠照銜杯

老向人間世衣冠知者稀獨從殘劫外坐看刺天飛野色
初深靜卮言無是非更堪衰草地寒雨一人歸

雪夜誦叔漈與吳摯父京卿唱酬之作次韻有寄

故人未了殘年興壇坫聲名各長雄還笑江湖宜我老誰
憐風雪與君同雞窗鐙火千齡盡蜃氣樓船一水通餘向

寒梅弄光景細香吹淚女牆東

吳先曾定吾文者縱浪人間有此雄更挈悲酸成獨往別
調宮徵略能同天威尺地徘徊入日出巵言肝鬢通忍俊
埃塵容寸喙酒邊爲指大江東

除夜

浮生千劫匆匆盡祇亂殘宵爆竹聲杯底笑啼終未解鐙
前世界百無成蛾眉漸惜供諸詶詠龍劍誰云有合并掃地
焚香吾意了江南贏得晚鐘晴

癸卯歲元旦題示魏季詞

以下癸卯

連連笳鼓起千街比屋翻成隔海涯舞葉風光聊自好喧

鐫兒女與相偕欲憑國論窺天意
賸有江聲入酒懷羨取
公貧能勝我門前一馬鈍如蛙

曾履初郎中由京師大學堂假還金陵於元夕見過遂招
楊詰甫俞恪士共飲

百年文物綢繆地三代規模想像間
子自尋源移寤寐天
其有意起癰癰歸來雪夜親行炙
擺落儒家爲解顏頓使
老夫忘世難燭殘漏斷共無還

夏劍丞太守見示元旦頌春辭次韻奉酬

別墨蠶九流微管尸一匡包纏釋孔懷
孰躡其中藏大造
怒設施燿若萬弩張機穽幻華屋藹藹調笙簧
蓬髮爾何

人挑擲傀儡場涕泗擘荒冥騰身據中央手摘海王星環
顧非我鄉蹴落黑彈丸遂圻東西洋其間富怪物種族穢
米量吐沫浮金銀晃曜難具詳天池九萬里安得從相狎
羣兒拍掌噪我有劍在牀藐彼萬醜類攫之爲嬪嬙次第
挂鯨牙盲風挾泱泱大陸化魚鼈當道猶豺狼元辰豁雪
晴兀坐聽煮湯遞君頌春作泣下反數行正眼不忍視憤
悶捫杯漿偉哉民學說虔禱揚馨香掇報倍譎辭劣凡同
栖皇

次韻伯弢懷范大肯堂之作

梅塢閒飄三兩花憑扶雪色散誰家暮年懷抱自天壤到

處池臺欺鬢華塵土一官迎燕鵲夢魂萬紙照龍蛇懷人
落日滿江海解對琵琶微歎嗟

揚州方地山澤山兄弟於去冬過訪瀕行澤山索觀近稿
因贈二詩次韻答寄

維揚俊物好兄弟共我狂言亦一奇蕭瑟江關成自廢流
傳文字肯相知當天日月孤鷹上挂夢風沙萬馬疲往事
心頭過歷歷未妨檣杪有傳疑

古之道術今安在鉅子疇人別有科照海光芒遙可接在
天精魄孰能呵方看芽蘗千霄漢稍覺榛苓足嘯歌斂手
江湖對鷗鷺孤飛閒立奈愁何

樓望醉吟次韻伯弢

鏡面淮流煙水昏
四山寒色暗空尊
偶開書帙敬謝客
無數酒船橫繫門
上樹黃雞諳早暮
齊竿白鳥見孤翻
高樓一笑煩長笛
莫聽江聲亙古奔

爲陳仲謩孝廉題先世竹香編修玉堂補竹圖

吾宗玉立鳳池人
天府圖書寤寐親
戲種琅玕戰冰雪
每邀冠劍拂星辰
先皇侍從今餘幾
勝地荒殘那可陳
入轂英雄終寂寂
展圖彈淚灑千春

正月十九日園望

禿柳城邊風散鴉
嫩晴閒護短叢芽
窺襟了了半池水
挂

鬢騰騰一角霞久客情懷依破甑新年雲物入悲笳春光
端與游蜂共欲縛茅亭聽煮茶

哭羅邠峴

吾生成哭汝恂恍入新年藥氣魂猶接春鐙夢不前晨昏
支老母人鬼託殘甑值得秦淮水流悲繞屋椽

夙昔承明德居然好弟兄獨堪懷抱盡稍擲歲華輕薄宦
關生事閒愁損道情惟餘歸骨路徧換子規聲

有客垂垂老還爲肺腑親無窮儒者事頓隔眼前人禍亂
行將及泉臺任更貧几塵閒鼠迹呵燭淚珠新

得叔解安慶郵書稱吳摯父京卿歿於桐城里居次前韻

哭之并寄叔濟

航吟酬句無朝暮指點江城角兩雄那料和鳴一鳥去直
教行哭九夷同文章後世卿雲顯師友當年孔老通活國
新編猶照眼瞳矐爭睹日生東

飲集吳園作

沈寂溪山斂手看閒呼鷗鳥立闌干梅枝柳蕊初煙合小

閣重樓落日寒海外虬髯酒座

日本同文會長根
津君深飲無與比簾前

斂股照春盤應憐反復能酣讌江左從來付謝安

日本領事天野恭太郎送酒

尋常未飲渾如醉既醉還醒祇倚闌慚媿隔牆防渴吻解

分香釀破春寒

西域蒲桃點酪酥東溟麴米得沾無何當眠倒櫻花下狂
寫三山仕女圖

近閱邸鈔易順鼎授右江兵備道馮煦授四川按察使沈
曾植授廣信知府皆平生雅故而當世之文人也詩以
紀之

三子才名世所奇迴翔笑附鬪雞兒中原正苦輸孤注儒
術由來漸四夷敢信安排備蠡使已憐老大負明時春風
旂纛紛乘傳可有邊愁散柳絲

寄題日本金洞仙史田端別墅墅可望富士筑波日光三

嶽其鄉人結城琢君并示八十九翁湖山愿賜題原作
賦此酬之

曾攜醉俠訪金焦隔歲傳詩壓使輶別墅依松想仙侶高
名配嶽在雲霄閒邀耆舊看泉活對撫壺觴帶海遙我欲
騎鯨戲三島橫刀獨立問風潮

次韻酬李審言詳見贈二首

齷齪緊軒椽抱甕春風前窗紙明蝸牛頗復污餘篇鬱紆
腹中事肯訴朱絲絃挂眼無古人殘竹向我妍及晨揖嘉
客擔簦輕山川投句一何奇風義相昭宣浮名老益恥牙
頰姑舍旃珂里有劉先

君興化人謂其鄉前輩劉先生照載

其人乃大賢懷

寶隕地下百世之所憐得君列驂斬作述映林泉達哉莊
生論不盡如火傳

江介盛文儒錯落懸眼前王

義門梁約公

攀荃蘭二方醉簡篇

山地兄弟

屠生山致揚妙音臨流奏湘絃袁宏

淡生

久死去坐想

神骨妍君盡狎數子若海納衆川猥逐頰唾餘肝膈寄一
宣我實怯大敵伏欲倒麾旂茲事在天壤細碎未足賢草
棘躍鳴蟲苟爲螻螻憐知新耀聖文派別導源泉非君起
治之詎易口耳傳

雨晴偶書

蹄齧綫閒轅下駒低昂晴色爛梅株千枝細鳥韻簧笛長

晝移來娛老夫

放晴又雨作

喧風欲起牆頭鵲
暗雨又隨門外驢
留與吳儂作春夢
驚寒說暖不關渠

曾郎中酒集河舫

郎中挾春氣與客上晴舟
波暖魚兒亂風長雁影收
酒人哀樂慣山色淺深求
呼出青天月爲歌水調頭

秦淮酒坐遇北妓按歌有京師之聲感賦

板舸燒鐙潮水平
風迴歌吹散春城
爲誰中酒傷情甚
飄入霓裳擲笛聲

依稀北亂滿胡塵鶯燕驚飛照海濱
今夕琵琶如飯飯江湖看作太平人。

於水閣歌席逢程子大太守驚喜有作

冷雨斜風水上臺看看絃板鬧如雷
坐間薌澤春微動燈下頭顱子竟來
飲食賤儒餘自喜死生今日欲憐才
提攜官興兼詩債一片秦淮笑酒杯

二月三日顧石公招飲龍蟠里

晴鳩呼影雁橫翎已有羣山爲我青
水竹四圍寒酒氣歌

呼萬象護茅亭詩人老去飯仍熟海
客經過意共冥

時鄭
堪

陶淵明詩待飽風光一尊盡梅梢柳下數春星

月夜江行抵南昌

初了一春雨晴江上夜舟岸迴花氣接網臥月痕秋夢枕
年年浪鄉音處處謳飄鐙靜城堞殘吹已飛愁

由章江門渡江入西山

晦雨淹江湖快晴脫陷罪委楫就籃輿醉眼始一騁春氣
襲四維槎蘖換明靚糝紅綴衆綠桃柳千村映野水亂無
次隴陌浩已併艇子儼浮卮飄危此寄命稍入岡紛披轉
瞥影寥曩西山端向人芒寒而色正煙翠從擺落沁染肝
膈淨晨昏懸雖心但有涕交迸百年依松楸老死孰使令
稽隙偷自娛照耀巖岫盛靖廬在其下還我麋鹿性

清明日墓上

看盡岡原枯草新
紙灰澆酒四無鄰
雜花時節春風滿
重到孤兒是路人

繞郭雖烏亦自還
穿林驚雉更相禁
年年窺我鬢絲白
無數墳頭夕照山

靖廬樓望

小立青蒼滿春陰
更一鄉雉翻山自
合蛇出瘴能香野
哭銜杯見簷題照鬢涼
穿栽分手迹桃竹爾成行

廬夜對德基族弟

五年終見汝生死
一靖廬往事堂堂在
荒山莽莽餘飄零

此何世飢飽可關渠猶說持門戶孤鐙落淚初

靖廬雨夜

微陰吹作千山雨仍到殘宵捉肘時繞屋蛙聲小鐙穗書
窗蟲篆亂花枝夢邊宇宙能添我物外謳吟更有誰坐待
村春破荒寂魂翻眼倒此孤兒

雨中望西山

山中雨又雷草樹盡披靡起視嵐氣深屋角改蒼紫西山
隱天表恍褰百重紙飛光接微茫走勢失迤邐金蛇掣雲
海蛟螭角嶷嶷騰蹕攫虎豹萬怪在其裏亦有列仙人冠
帔跨騄駼擁簇千芙蓉儀衛鵠而螭貝闕陵虹梁環瀉銀

河水的噪閃低昂浩漫斷涯淡凝眼眩揣摹掬涕一洒此
魂氣際天地取鬪蜂鬪詭會見長風嘯探彼以忘死
雨晴看廬後桃花

幾株吐盡空山色秀竹初松掩映之惹向樓頭問晴雨暖
蜂園酒獨來時

題朱文公題字石刻

井序

光緒初揚州土人掘地得石刻一中爲擘窠書曰容膝
末贅晦翁蓋朱子筆也其鄉李氏子攜以貽先侍郎
靖廬落成遂嵌諸壁且謂容膝二文與廬同趣有符宿
識方欲紀其緣起稍徵跋詠遽不及待哀感有作

淵明斷句紫陽碑江海將攜聽客爲七百年來幾陵谷兩
三椽與照蛟螭竟符宿識摩挲地獨記行吟慘澹時後死
爭能共胸臆縣縣神理孰成虧

晴廬坐雨寄懷城中樂羣學舍熊季廉蔡公湛

兩生奪席道能肥言志雍容鼓瑟希漸欲從周依魯叟

季廉

學源不倚虛駭
孟德新出諸說

未妨解老有韓非

子公落
有識老

蟲天誰覺雌

雄在鯨海剛成痛哭歸

謂季廉猶于
還自日本

霧雨沈冥伏巖谷

酒懷閱世益孤微

別西山取途四十里至省會作

陰風獵岡叢游子撒然逝回指寸寸草煢我來時淚顛倒

向遶途陸隴紛鱗次氛霧映晨色籬花醒孤寐犬吠原上
村浹治松竹氣四山會雷雨春漲浩莫制木杪明波瀾坐
損耕稼利溝防事甚大明農儻爲計十里怯泥潦僕吁困
顛躓野航呼使前行李得小憩放溜疾瘳驚撫此茫茫地
飛雲逼高桅一縱江湖思須臾見城闕晴光散笳吹飄颻
鬢絲白拂繞萬重翠定諗蒼髯丞銜觴遲客至
謂署新廬建丞陳鑑
楊叔玫大令酒集東湖席公祠客有朱生縱談哲理一座
盡傾賦以志別

惠施能事鳴堅白攜就湖樓倒此觴萬古神思與開闔一
時豪彥各低昂吹噓花氣欲成雨明滅鷗羣還隔牆白眼

看天余徑去西山影裏鬢蒼浪

九江夜泊

電火燒江雷破山毒龍噴沫滿人寰孤舟一夜欲飛去合
眼捫天祇自閒

雨中過安慶有懷姚叔節

斬新春樹鷺邊城千里寒江澀不晴中國少年姚叔子爲
誰費盡短鐙檠

贈日本畫士山本梅涯

田能今尾東瀛秀

田能直入今尾景年爲日本南宗寫生兩畫家

又見梅涯老畫

師劍底四州供點綴尊前萬象與迷離傳神阿堵定何物

倒景滄溟照所悲漫寫江南金粉地歌船還許片鷗窺

抵九江兩訪壺天遞叟值實甫於次日赴右江道任話別

還宿江樓

閱世成戲游蕘江警孤客捨舟飛雨高遂造隱淪宅城東
水木地雲氣自然白到門繞千畦未覺鐘梵隔玉色壺天
翁履道無轍迹翁獨在世間有涕念夙昔文度功名手膝
上劇可惜縱去投炎荒萬里看羽翮還緩須臾去婉孌映
戶闌白頭父子間使我久怵惕平生所語事鬱鬱在肝膈
庭鴟不留人杯酒堅自擲江樓曉鐙燼波濤向空碧
閏五月十八日入西山謁墓抵靖廬宿

百日迷重至山風寫汝悲飄危成獨老呼籲竟何爲草木
扶天色巒阿定雨絲更堪孤榻夜鐙火數兒時

靖廬樓夜

獨夜川原數過鴻關干呼月萬山東爐煙自亂蓬蒿氣鬢
影初橫禾黍風誓墓義之聊復爾買山巢父欲誰同癡兒
謬託桑榆計種樹書成酒椀空

靖廬牆側有蜀葵數株戲賦

雛姝三兩倚牆隅背日籠煙也自殊卻憶江南蔓生處有
人夜斲付騎奴

抱冰居士今迂叟更表茲花費製裁

抱冰尚書極賞蜀葵
官廨隙地列植殆徧

之皆賦劉葵篇自云表徵本司馬迂更校士錄成俄約廢九

門應許徧看來

尚書方留京及師校閱經
濟特科試卷及議俄約

龍蟠里讌集次李薌垣藩使賦別韻

火雲幻挾睡驪蟠儘有林樾挂屋端勝日偶邀車騎過他
年傳作畫圖看古今人物容相及桃李光陰惜已殘巖穴
民依視此酒漫云吾道屬艱難

掃葉樓會餞薌垣藩使二兄解官去江南

盤拏磴道翠嵐空飄袂涼迴萬木風觴詠流連動高閣江
山依舊擁羣公蔽虧晴雨都成幻俯仰襟情了不同要識
安危繫憂樂闌干憑記夕陽紅

使君於我忘年友回首功名杯酒間正有江湖共饑渴卻
煩父老苦追攀亘天虹氣那可掃挂樹蟬聲相與閒探壑
看雲留一笑行吟余亦鬢毛斑

題夏伏雛燕北紀雛圖冊

古來未有拳民亂一幅四洲兒戲圖歷劫少年還好事炎
晝將攜驚老夫

而翁中酒仰天時數說崩離世未知四百兆人原禍始淚
看成海夢成絲

次韻答爽召南觀察見贈

一舸江湖各自還

謂近日常自漢口
余自南昌返金陵

每依晴郭照塵顏軒

眉風日門前馱合眼松楸夢裏山玉匣新吟微有異金鑾
密記莫教刪煎茶忍話神州事且放孤雲屋角閒
贈敬安上人還天童

汝來亦無事兩眼看閒人了了廿年在駸駸萬態新袈裟
帶海氣吟嘯接花晨奪我秦淮月歸防猿鶴嗔

滬上味蕘園晚坐時爲七夕

迴廊繞盡馬蹄聲茗坐看人若有情淺草棲香鶯館在靈
風引佩鵲橋成一家四海餘閑地隔世孤吟見此僧

不
到
此
園

年已七且趁殘陽數飛蝶亂雲檻外正縱橫

喜鄭蘇龕遷四品卿沈愛滄除順天府尹遂有此句

酒邊餘二子江海震驚之各有攀天夢甯爲此世知洵洵
安所定耿耿果能奇士氣支天地吾言未敢私
雨夜攜客就小舫取酒盡醉作

溪漲飄歌盡船鐙聽雨來秋吟滿隄葉坐擁半城雷時節
魚初美江湖意可哀殘鐘一看客始覺負深杯

園居對雨

獨酌不成醉翛然軒館涼池荷洗朝雨檐葉動秋香意起
無窮世笑尋何有鄉啼蠻堪溷我切切近胡牀

鑑園集餞沈京兆

山氣隆隆合溪流宛宛過晴樓潛榆竹秋佩照藤蘿深念

傳杯靜微陽拂袂多此行關國論應解憶嚴阿

次韻答黃小魯觀察見贈三首

別髯逾一歲祇如隔旦暮依然蛛絲窗茶鼎藥爐駐抵几
據衷曲持之或有故窮老盡氣力笑致悠悠譽孰憐耽榮
華轉以廢百務聖文見道真塗澤乃皮傳髯傳濂學說甯
無爲此懼方今六合外未可尋常諭主義侈帝國人權擬
天賦惜騰杯酒間姑就哦斷句沈沈萬鼓亂渺渺寸心赴
江南黃篋舫幸髯有所遇

晴雲燭天墟倏忽江海暮髯來貌枯禪恍挾飛錫駐挂眼
閱大千洵洵正多故吾亦邂逅物外誰毀而誰譽往者萬機

張曰開物成務慷慨慕祖生痛哭追賈傅輾轉爭覆轍徒
令飽憂懼陸沈事益亟口舌欲何諭獨嗟活國手齷齪使
治賦種桑長江邊坐感淵明句猿鶴久招人掉頭且相赴
髯終訪西山霧豹遂奇遇

園林滿秋光萬鴉使之暮荷香入柳氣氤氲四廊駐與髯
坐無事百慮倏成故託茲金石好任彼竹帛譽世久去黃
虞道甯稱卞務頗欲匡謬俗柰一齊人傳舉目患氣盈銷
骨流言懼天人優劣場淵衷已孤諭讀屈遠游篇續馮顯
志賦顛倒探混茫風煙照新句吾衰抱蠹籍精亡願空赴
信髯固絕倫區區嗤晚遇

用前韻寄懷薌垣布政二兄同小魯作

憶爲金焦游乘興不知暮數點夕陽山遂共啼鳥駐江聲
蕩鐘鼓形便驚非故猥依鐵甕完疇擅玉帶疊明公起邦
特袞服經世務初戒南紀防遽引東山傳橫流莽滔天獨
立屹不懼鄰越恣奇賞微許樵牧諭臨水想移尊登高況
能賦天命承几杖漫傷思子句至人道哀樂道定情始赴
還期莊惠間得適濠梁遇

雨集淮舫小魯感憤有作次韻調之并示同坐諸子

秦淮誰不愛矧足娛衰暮驟雨亂秋晴酒舫未移駐扶攜
東南朋狎謔得親故娉婷映歌席幾輩冠時譽一笑等螭

妍措大何所務擊節謳承平孰爲伊與傅爭及行樂時得
無胥溺懼髡獨抱深感聒使兒女諭賸解後庭花且就閑
情賦歲月憶江南都成斷腸句煙颺慘澹合琵琶終繹赴
六代萬鐙前醉誇雙槩遇

次韻寄叔濟

叔濟走京師蹴踏九衢暮喘汗忽不樂忍傍轅駒駐去來
疾風雨誰解接浙故入穀盡英雄跼蹐竊盛譽一棹江海
間揮袂謝塵務縱酒過狂生掃門看黥傳萬方聲颯沓寤
寐噬臍懼雅廢賊民興詎可文告諭傳來詠懷作如誦蘭
陵賦發蒙砭膏育世儒無此句側聞邊燧急奮欲挾策赴

士爲知己死庶幾雲龍遇

重九放晴擬與小魯爲登高之會不果戲次其韻

髯來亦何爲癡吟晨至暮鍾阜翠微亭未肯攜屐駐況當
喧日皎燕鴻翔故故蜂頭作重九自昔飽稱譽髯笑但掉
頭臣誠不知務詩法研涪翁書勢臨鍾傅欠仲呵屋梁微
令饑鼠懼客復貿貿來侈口從諛諭閉門可造車據梧曷
獻賦跼促異所聞端痛茱萸句江城催木葉鐙畔寒碁赴
飲酒讀離騷意與古人遇

九日謝客獨與小魯割烹會食伯弢枉詩見嘲次韻戲答

二首

九日花晴風欲高閉門說食便能豪肥牛嫩鴨隨時價走
馬騎驢看汝曹北極樓臺懸淚眼東關歌吹護翎毛莫嘲
老去疲腰脚還解提壺注諸臯

銳也身無六尺高自家痛癢仗誰搔補官未合八成例負
博猶堪一戰鏖旛轅門鴈爪下風埃吟榻蟹螯操人才
堆眼荒城大坐待繁霜點鬢毛

贈別小魯還武昌

髯至寒蟲戀苦吟壁燈縮手坐深沈乍能吐臆參時變稍
恐隨緣損道心歸去江湖殘淚在低昂親舊濁醪尋律狂
如問匡廬隱飛盡千巖瀑布音

園館夜集聞俄羅斯日本戰事甚亟感賦用前韻

三兩儒冠賸醉吟起巡秋館漏沈沈烽煙遽有窮邊警奴
虜難爲此夜心鵲蚌傍觀安可幸豕蛇荐食自相尋苞桑
磐石憑誰計獨倚殘枝聽殷音

淮舫玩月次伯弢韻時袁編修嘉穀同游

一片淮流匹練光垂楊初禿葦初霜龜魚依棹潑明月烏
鵲投枝飄夕涼邀笛胡牀還自賞閱人疏鬢漸成蒼聞歌

煮茗兼哀樂贏得江南是故鄉

謂袁嘉穀籍江南今以雲南
庶吉士試經濟特科第一

改官
修

十六夜水榭宴集次前韻

月上簾櫳瓊光憑欄十里水如霜都成意氣當筵盡坐
戲蘭茗照睡涼波外歌喉尋繚繞鐙前山色界青蒼柳絲
莫放邊愁入準傍鴉窠作醉鄉

林訪西觀察夜集秦淮酒舍用前韻賦呈一首

幅巾據席倒波光豐頰飄髭兩鬢霜盛世公孫成老輩初

宵煙雨動微涼舉肥許有人倫鑒相坐客術頗談倚醉遙驚海

氣蒼檻外疏鐙留一舸爲公指點白鷗鄉

聞熊季廉於江西鄉試榜列第一因賦

灰死文章萬劫塵幾憑歸夢數飄茵南州冠冕真餘汝孤
楊欷歔若有人誰使英雄還入彀欲移瀛海與垂綸鯢鵬

斥鷃同天壤龍性私憐故未馴

訪西觀察次韻見詒復和酬之

琢句騰爲干鎔光低昂取醉撥糖霜魂乾靈籍孤檠告愁
濕蟬音萬葉涼坐覺風雷增洶洶獨支皮骨向蒼蒼吟邊
閒卻功名手畏壘依稀更有鄉

酒集園亭次前韻

篩廊晴影敗荷光池上尊罍點點霜解佩俊游渾漫與切
雲孤吹已飛涼十年國事悲歌盡數尺牆枝夕靄蒼還共
月明動羈思雁聲長在釣游鄉

抵南昌館夜有作用王夢湘太守秋闌聯詠韻

我來祇有萬鴉飛煙冷江城雨打扉殘夜低徊計安出舊
鄉臨睨意多違霜天影入鵲鵲亂茶鼎聲兼蜚蚓微自笑
老懷餘一擲醉醒丹素更誰非

過趙伯臧太守從之乞畫輒獻長句

海角飄鐙失歲年婆娑老守亦華顛勝流暫遣驚三絕

又謂

得子培夢
湘雨太守

久宦甯論值一錢原本山川聊自寫邈緜神旨

欲誰傳憑看水石開秋晚哀我爲添負郭田

贈別吳炯齋學使去江西還 朝二首

故國蘭叢秀可扶得君滋漑掃榛蕪三年擁傳風光曉九
變尋源寤寐孤會有大雲起膚寸滿聞餘響散江湖殘陽

爲寫蒼茫意延頸迴眸一歎吁

侯官弟子眼中人

謂熊君元錫

囊括羣流嚮道真自挈驪珠映

滄海勞看鵬背亘天津菁莪養士甯無謂縫掖匡時恐未
倫早晚鳴鸞移仗罷可忘章貢水如鱗

題贈沈子培太守

初臥股肱郡還憐當代儒采風心怵惕去國夢模糊雁度
邊聲切雞鳴士氣孤扶襟照巖穴元化在斟酌

蓋公爲上客

桐城蕭先生穆方留宿郡齋

道論副淵謀播盪詩書氣雍

容士女謳白蘇餘故事

君謨之傾滄東湖州如白蘇

郊島極幽憂何

日尋江閣擎杯接片鷗

入西山峭廬次韻酬夢湘枉贈二首

瞋眼西山風葉飛依依
貓犬認柴扉百年歌哭
敝廬在一徑松楸殘夢
違樵牧晚穿雲氣暗江
城隱吐月痕微人生隨意
尋邱壠從悟幾之誓墓非

孺子亭邊白雁飛遙憐把卷
闔雙扉抱關錄錄吟仍健攬
轡茫茫願已違儘覺鯨波掀
海立獨看蟲篆映鐙微山中
酒熟黃雞賤漫向旁人說昨非

以西山赤色稻餉子培太守
媵以此詩

南昌老守墨者儒手鈴牘尾
腹詩書旦暮趨謁喘廣衢歸
來仰屋捋髭須一昔過公退
食餘釘盤凍筍佐提壺政經

縝密酌謠俗旁辨物產登上腴屈指輒杭觀音仙肌膚凝
雪堆明珠達官貴游競一飽希價責取供行廚公笑掉頭
未渠許久羈朝列嗜好殊太倉陳粟慣腸胃反棄精鑿
珍穠稗吁公儒素繕性命土人誇客徒區區去臥西山亦
何有日飯瓦盆漉甑甑赤稻苦糲元氣厚顆粒硃砂脫杵
臼捆載餉公強五斗京國風味儻在口助公作健負腹否
況乃東湖落公手穿下埤高刮淤垢千夫邪許走黃耆公
且加餐利永久賀成更致輒脚酒

次韻寄答夏劍丞太守海門權所

勞勞津邇溷公爲海轉江迴共此悲飄日客愁鷗自亂干

雲兵氣雁先知重尋父老牽裾地贏得湖山中酒時聊欲
十年期樹木橐駝故技有餘思

距峭廬十牛鳴爲邠峴卜葬所往觀感題

門前小山蛇蜿蜒裊裊佳氣翻雲煙抗手四野草木靜記
取枯樹留牛眠平生親知汝又死地坼天荒欲何俟明年
歸骨逢太平哭酹江南一杯水

樓望

嫋嫋高雲過雁殘滿樓山色酒杯寒牆西合抱數紅樹賸
倚斜陽帶淚看

讀侯官嚴復氏所譯英儒穆勒約翰羣己權界論偶題

自有天地初莽莽靈頑界既久挺人羣萬治孕變怪聖哲
亦何爲扶生掖凋瘵其義彌亭毒日震聾與聵吾國奮三
古綱紀匪狡獪侵尋狃糟粕滋覺世議隘天閑縛制之視
息偷以憊卓彼穆勒說傾海挈衆派砭懦而發蒙爲我斧
天械又無過物憂繩矩極顯戒萌芽新道德取足持善敗
復也雄於文百幽竭一嘅揚爲噉日光吐此大塊噫立思
控孤誼餘痛託紹介挑鐙幾摩挲起死償夙快

題張季直東游日記後

吳先叢錄耀寰區又見東游閱此儒莽蕩襟期依海若鉤
探治要應時須咄嗟興國甯容喙層累爲功在舉隅歸語

士夫專二策

君以教育實業
二者爲主義

天風飄盡淚痕無

寄公湛

風軒疲一見微惜病中身
俊賞搖搖盡邊愁蕩蕩新
萬端無可說孤唱爾何人
大事殘鐙下冥茫覩妙因

長至墓下作

衰草延晴照深松蓄亂颺
千山寒自獻孤鬢暝相搖
驚耗排天入

時得各報
協議辨報

奇哀迸酒澆沈泉定張目
雲葉答蕭蕭

十一月十四夜發南昌月江舟行

晨席張大談夜城曳微醉
負手江茫茫一片鷗鳬地
露氣如微蟲波勢如臥牛
明月如繭素裹我江上升

子安乘興處牧之懷舊情西山壓夢破微憐篙櫓聲
一笑對千渦細鱗銜月去指點白沙灣夢痕所挂樹
阻風雞籠山次答小魯見寄韻

咫尺城闌隔醉吟風飛沙暗萬鳥沈半生孤棹去來處一
夜荒江輾轉心殘世聲名堪老醜寤歌徒侶可追尋頽陽
不管魚蝦市臥聽春天澎湃音

初聞西笑變南吟

時君將赴
官陝西

江漢鷗翔河鯉沈爲抱陳編

演濂學莫忘輓轂卜天心虎牙四海輝輝見駿骨千金黯
黯尋漫擲丸泥塞函谷漢京鐘鼓有遺音

舟夜感賦

吼浪風猶滿移檠意有初將攜十年淚狼藉半船書衆醉
爲何世天亡欲到余飄魂亂呼雁江色夜吹噓

雞籠山舟上寄謝熊六文叔惠南豐橘

南豐號壯縣產橘世罕覩別種自流遺落實美氣候脆瓣
緣素絡薄膚隱黃皺圓握靈蛇珠細玩怖鴿殼表裏淨渣
滓甘芳沁營腴弟蓄新會橙奴視洞庭柚磊磊聯瓔珞爛
爛堆錦繡其鄉吳太史

謂吳嘉賓

游譙江南舊量致毅勇侯

歲歲起爲壽讚歎設九賓名品歸領袖竭來苦津邏苛稅
懲偷漏負販頗褻足攪雜摘近園熊侯省征裝選購盡妙
秀滿載輕江湖快啖羅左右三日遮昏曉負舟游弄殼羈

孤念家國悲惱互奔湊豺虎據門堂龍蛇攪合宙裂土評
分瓜巨禍又誰救憤腸張燥吻探首覬放溜從容嚙瓊漿
恍惚飲醕酎冤魄溷囚拘俄頃荷赦宥嘉惠焉可忘竊比
封君富平生耽異味親友亦樂就土物薦晶盤跳踉到童
幼還持誘垂涎邦寶訝天授

泊王家渡

五日舟移三十里放歌縱酒笑誰同江頭惡浪猶能舞篷
背寒雲自作叢忽我窺探雞犬岸關人寤寐馬牛風喧喧

千舸開網令

每歲冬始大集漁舟設網捕魚曰開網縣官徵其稅爲令

何處苔磯立

釣翁

在南昌得閩人書病小瘥已能日爲我錄近詩二紙舟窗
悄憶率爾題句

書來未肯念淹留祇別殘釭照亂愁卻笑尋常仰天語累
卿扶病寫蠅頭

題寄南昌二女士

康愛德

親受仙人海上方探囊起死自堂堂更煩煮盡西江水滴
入雛鬢愛國腸

周衍巽

日手東西新譯編鸞姿虎氣鏡臺前家庭教育談何善頓

喜萌芽到女權

舟去王家渡十里許風厲仍泊書以寄興

陶潛淹規林韓愈羈鹿角攀望過千載阻風事如昨兩公

鸞鳳入江湖伏寂寞而我比蠓蛭倍怵波浪惡起念帆櫓

制尺寸遭天縛今代汽船興訝亦格沙礫

入冬水涸汽船僅抵吳城去省

會百餘里往歲設機具下上營疏鑿茫昧爽成功劃隔百重幙

又議敷鐵軌橫縱貫閩鄂假道潯陽岸不值短夢覺此實

便且利運載益有託煩費孰嘗省甘爲衆口鑠生命懸穹

冥人事遂乖錯我忝鄉井役束手視民瘼鈍躓坐自窮分

當困尺蠖連朝颺愈厲掀瀾肆賊虐高鴻鏃其羽魚鼈怕

藏壑蠶鹽既乏空乾樹掃如掠頗買縮項鰻釘盤佐葵菹
髮亂不得梳面垢聽交謔跼蹐冷篷底奚以豁腰腳紛紛
探篋籍顛倒噉糟粕神意頑不舉萬古莽蕭索船燭燭殘
燄綽約控寥廓猛出天地間倏隨煙霧落樓闕明竹叢水
石挺梅萼宛彼窈窕姿聯翩擁吟酌雜佩臨參差妙襟緬
闊畧涕笑拱揖之拊枕增怪愕安能置爾前一附東西鵲
過樵舍

老我江湖何所悲巨縉東釣恐無期一年六度過樵舍微
許沙頭鷗鷺知

吳城作

千搖萬兀落吳城把酒呼魚轉自驚聊信風痕飄獨夢不
成雪意放微晴一隅都市沿衰耗百戰戈船送老成曾寫
望湖亭上語祇今哀雁暮縱橫

詠篷底蜘蛛

篷底蜘蛛意絕癡緣篙偎槳已多時也知滿腹槎枒甚晚
向風江挂一絲

於吳城下三十里曰朱溪乘汽船渡湖

尻輪滅景萬靈呼雁鰲山川挂眼無肯向神君乞如願浮
杯祇乞縮江湖

風靜雲晴五老峰氤氲貪看舊時容褊心又恨舟如箭在

想松蘿暗萬重

泊九江懷煙水亭舊游

故人頗與縱游處

往歲屢與易
實甫同游

野飯僧牀忘歲年冷月自

浸一湖水孤尊空到九江船生事齷齪那復道陳迹俯仰
還可憐巉巉廬蜂插雙眼伴取鷓鴣照槩眠

九江舟夜寫書遣使詣永州問席氏女弟病狀惘惘有作
汝有三年病吾羈一息身呼天餘骨肉入夢益酸辛世隘
窮終敵江迷憶未真九原憐護意顛倒竟何陳

登大通汽船未發客傭言都昌詩人李秀峰客死海上悼

以一詩

秀峰峨詩浩千萬泥磔颯沓奔河漳去爲小吏陪偃強晚

耽神仙攀渺茫鄉國此士慙可取羈旅遂死吁誰傷平生

臭味放蠻海

君與易寶甫同寓右江道

魂魄依之烽燧長

江上雜詩

玲瓏曉日鏡屏光山色千層自繞廊劇有客愁浣江水西

風橫雁亂鷗翔

坐上花枝照逝波海西卉木共婆娑軒眉籠眼闌哀樂蒼

紫低昂奈汝何

船題列紅梅茶花及泰西樓柏之屬

嬈嬈亭亭絕代人冰肌玉骨立千春彭郎奪得專佳話祇

倚催妝句句新

小姑山昔年攻復九江諸郡縣楊公岳回功最多自彭公玉麟有彭郎奪得小姑回

之句世遂專以推彭而楊公亦嘗笑
語人曰雪琴解賦詩因得獨專其名

跼萼葳蕤爛紫芽仙靈擲果種朝霞可憐縹緲江山上使

我含情不憶家

九華山

藹藹東南一都會金銀樓觀壓山川歲時四海騰豐稷別

有傷心問米船

蕪湖爲米
商所集

殘年飽飯了無慙叨許嵇康七不堪留得神州歌哭地一

竿吾欲老江南

和肯堂雪夜之作

偃仄江南無可語祇餘殘淚灑殘年

山南昌返金陵便況
得席氏女弟問

當夜雪圍亭畔更覓吟魂几榻前萬古酒杯猶照世兩人

鬢影自搖天癡兒未解寒鐙事任咤尖叉合比肩

肯堂有感憤題金陵詩次其韻

笑啼自昔成千劫性命於今值一豪猶許區區豁雙眼雪
泥沒蹀酒旗高

我還又到興亡地微覺孤檠擁萬鍾蟻視玄黃參一解梨
洲而外祇而農

閔邸鈔前安徽青陽知縣湯壽潛著賞道銜署理兩淮鹽
運使湯本故人也驚喜有作

湯子聲名久爲儒肯自憐飛書萬行淚卻聘五湖船歲晚
看人怯時危覺汝賢稍關朝野事瞠視轉茫然

雪夜再和肯堂兼感近事

拂衣世上百十事放艇江南三四年幾共子吟狂雪外獨
看誰臥短檠前傾杯自照尾閭海呵壁都成鱗甲天莫便
歛歛對檐樹明朝飢鵲噪隨肩

公約酬范大詩甚美因依韻奉貽

四象橋邊梁處士劇哦妙句照杯清沈冥梧几欲頭白突
兀儒冠爲眼明被酒向人成氣象籠鐙過我見生平門前
帶水抑何戀和汝書聲遙夜鳴

朱鞠尊觀察出示東游閱操日記讀訖感題

吳張游記爬搜盡別撫新編微尙存三島旌旗照蒼莽卅

年子女見根原銅山煮海魚龍沸鐵騎摩天虎豹喧強取
禁方泣相視國人儻解太和魂

立春夕對月

鴉銜缺月在檐端醜石疏枝負手看漫向今宵數城柝微
風吹酒是春寒

次韻答季祠見贈二首

西方彼美人如玉環海羣雄像鑄銅古事今情滿孤抱天
涯歲暮共悲風阡危國勢遂至此浩蕩心源焉所窮枯几
禿豪君莫笑夢回負盡蠟鐙紅

鬢髮雪霜面河縞朝朝醜對鏡奮銅何如居士半畝宅消

受伽黎一臂風門外煙埃自開闔枕中鴻寶許研窮醅醪
抱膝入勝地看取磁盆梅蕊紅

戲次前韻示季祠

年少賈生何謾誕垂涎萬物以爲銅卽今橐籥病元氣虛
對游絲轉相風蠅蝨處禪偷自活鯢鵬振海與無窮想公
破睡駘駘坐時睨長虹貫酒紅

魏蕃室觀察過談次前韻感貽

已憐血化千年碧初看腰懸三尺銅一出國門迷死所重
尋江介數家風雷霆戰鬪天將壓桑土綢繆計欲窮賴有
歲寒好兄弟

謂阿兄
季祠

銜觴深念撥蠃紅

寓興五次前韻

半壁江山依皂蓋一時人物躍精銅
折衝竟乞花門將填撫還高玉塵風
自昔石頭從席卷誰能七首螭圖窮癡
兒謬信龍蛇識泣對倭刀血染紅

劉聚卿觀察屬題晉義熙銅鼓搗本傳
爲虞舜廟祭器有阮文達題字

蠻製流遺貴經儒識別真雪鐙一披
映今昔入悲辛虞廟愁雲滅瀛寰戰鼓
新迴眸萬靈伏憐爾義熙人

大風起池水盡飛圍居坐對悄然增感

醞釀爲淫氣掀轟趁亂春誰移大塊噫
掃盪到予胸雲壤

鷹鷂疾枝危烏鵲慵獨憐一池水呼吸動潛龍

近感六次前韻

逐臣吟付汕頭舶

汕頭公度京卿由黃公轉寄近時

歸使魂依足尾銅

朱觀

察足尾銅升甚悉歸

抑塞襟期問杯酒蕭疏鬢影散檐風

恩仇新舊仍千變合從連衡已兩窮孤注不成成局外

談

俄局外戰中立中國可憐猶睨擲盧紅

小除後二日聞俄日海戰已成作

萬怪浮鯨鰐千門共虎狼早成鼯臥榻彌恐禍蕭牆舉國
死灰色流言縮地方終教持鷸蚌淚海一迴望

後園茅葦鋤除盡遽得曠地數畝晚步其間吟二絕

雪壓霜乾茅葦空
頓驚大陸開鴻濛
日沈細步啼鴉去
酒袂孤翻河漢風

兒童競作拋毬戲
廩廩養食連種菜
園留與老夫候明月
累啼歌嘯了無痕

過季祠

日暖街頭鵝鴨喧
幅巾尋子欲忘言
追逋饋歲游塵外
手疊叢殘獨閉門

已解螺師吞大象
還迷蛛網挂游蜂
道人說法諸天現
狡

獐都過自在胸

君好佛
故云

除夕二首

裹飯無長計，噤吟盡歲時。
蛟蛇方鬪穴，鸚鵡且依枝。
園石滋苔印，街燈眩雨旗。
江城吾徑醉，偃蹇仰天奇。
妹化蒼梧野，兒遮富士峰。
穿雲魂自去，對燭涕無從。
酒氣冥冥合，鱸熏曖曖供。
殘宵開運會，欹枕聽鳴鐘。

元日放晴季祠伯純見過

以下甲辰

晴風吹雨色，佳趣在園林。
柳蕊春相動，篁叢曉自吟。
海雲兵氣落，人世酒杯深。
二子游方外，形骸肯見尋。

感春五首

蟄居環四維，桃顰春氣帷。
楊簪幽幽萬，象狡焉肆好。
鳥低昂鳴禿，條引柔翠暄。
寒坼穹極聳，哉造化意齷齪。
不訾

軀皮骨此焉置駕鼉駝地折煮龍駭海沸丁子雞三足何
者爲吾類一縱無翼飛點滴牛山淚十日射九垓震蕩以
失次反鑰塞其扃拘拘覲文字得喪鑑捶間嗟爾挈瓶智
雜置王霸書其言綜治亂慷慨一時畫指列亦璀璨世運
疾雷風幻轉無數算冥冥千歲事孰敢恣臆斷況當所遭
值文野互持半垂示不過物道若就羈絆又若行執燭迎
距光影判倍謠勢使然安能久把玩巍巍孔尼聖人類信
弗叛却爲萬世師名實反乖謾起孔在今茲舊說且點竄
撫彼體合論差協時中贊吾欲衷百家一以公例貫與之
無町畦萬派益輪灌

國民如散沙披離數千歲近儒合羣說曉曉強置喙日責
愛國心反脣笑以鼻疴癢本非我我愛焉所寄生今探道
本亦可決向避天地有與立綢繆非細事吾尤痛民德繁
然滋朋僞東掖蹟於西甯獨鑒厥智環球懸宗教始賴繕
萬類廝養場竈問上帝臨無貳俗化得基礎然後圖明備
嗟我號傳孔梓直雜兒戲回釋旣浮剽耶和益相懟嚮見
龍川翁組織別樹幟謬欲昌其說用廣師儒治惜哉畏彈
射又倚厭世義徒黨散四方杳茫竟誰嗣

咄嗟渤海戰樓檣湧山嶽長鯨掉巨蛟咋死落牙角騰挾
三島銳其勢疾飛雹立國何小大呼吸見強弱稍震邦人

魂酣夢徐徐覺方今鑒羣雄萬鈞操牡鑰之死而之生妙
巧詎苟託醉飽視息地一呷鷗掃籜奮起刀俎間大勇藏
民瘼茲事動鬼神躍與淚血薄一士滄瀛歸蒼黃發裝橐
攜取太和魂佐以萬金藥曰舉國皆兵曰無人不學

自我失怙恃灑血六載間仲冬妹又逝雪風驚我顏昔妹
臨哭母羸疾見眉端後屢警禍變冤悲結汝肝卒卒歲紀
流茫茫川路艱天平使負汝魂夢撫汝棺回念我之窮褻
糧遺我餐四海老倔強微憐汝所完大男羈東溟猶祝汝
平安報書銜龍蛇烽燧照海山世難日迫蹙而我了不干
祇有春鴻南孤恨從飛翻

次和吳鑑泉觀察鑑園春集之作

結構江南好洞天每尋垂柳放春妍
通橋野寺初傳粥繞郭晴山欲化煙
勝日歌吟園水石行廚酥酪點冰筵
英雄老去閒鷗識慣臥闌干艇子邊

遣興用伯弢除夕韻

兀兀埃凡間託世一長夜竊悲韓愈語
志欲死閒暇熟視園木疏穀音時上下
屨襟引碎念詰曲不可瀉匏繫亦何爲
息息閱代謝嵇康嗜操鍛陶潛喜穫稼
勞生各有適縱浪於大化獨憐具茨野
途迷七聖駕至人無磷緇誰歟儻其亞
悶默自嗤哂終能問田舍西嶺章水陽
幽異片椽假

安論沒蓬蒿且與嬉臺榭不見遼海隅骸骨相枕藉

人日有悼邢峴蓋邢峴以癸卯是日歿周一歲矣

世又看佳辰梅枝暗放春驚啼猶昨曰生死隔微塵認樹

殘烏去移家舊犬馴海涯憐白髮謂其老母爲還作倚閭

人

有人傳蘇堪督師赴龍州道上作二篇因題其後

登壇風貌一軍驚旄仗攢楓嶺外明功狀區區捕首虜迴

看貔虎臥邊城

胸中邱壑壓蠻荒解辦詩人短後裝

君詩有平生不解後

裝之盤辟何如捲角特千金嚙特費評量

開歲逾七日與次申對門居各杜門不相往還戲爲一絕
車雞馬狗屬何誰爆竹聲中食蛤蜊咫尺門前有江海分
調瀉酪聽彈碁

左文襄二十四歲小像子異京卿屬題占此寄之

燕領虎頭飛食肉那讎天人十圍腹公功名流千萬歲逼
視英風起尺幅衡疑插天洞庭深吞吐萬象迴初襟胸中
早自比管樂想見承平抱膝吟

春晴攜兒女嬉游園池間二首

嫩綠初肥楊柳絲池頭照影一攜兒暖風薄醉成滋味屋
角盤鷹欲下時

卷之四
七十四
攀條嬌女戲編簾蛇蛻鴟窠跳躍探差覺累心處都盡祇
依桑下祝春蠶

春月初佳徘徊有作

新月扶春暖依依梅柳風煙光初汎夕霞氣自搖空久立
江城大殘斟鼓角同還能亂情思有雁向遼東

初十夜半驟雷雨

分明鎧火拂牀書一枕驚雷破夢初疑是乖龍鬪滄海起
扶頭顚問池魚

書丹徒李生獨誦堂遺稿後

吳下風情六代前李生才致發幽研爲看濯濯月中柳初

按朱絃益渺然

中年哀樂撥皮真
羈旅歌彈了此身
但使江湖晚聞道
雕蟲解出草玄人

次申伯弢招棹小舫尋青溪勝處還就仲魯飲水榭

獻歲經浹旬
褰迹臥閨閤
及晨晴旭妍
春采若可奪
夙侶挾游尋
單舸縱健鷗
始穿橋市喧
遂造山水窟
柳林蔚佳氣
颺絲綠如髮
碕岸州渚間
雜英並怒發
鍾嶺轉溫潤
孤雲陰欲斲
蒙籠竹石叢
蕩與煙嵐闊
其下散平楚
虹梁跨超越
窮居遺物候
誘我眼目竭
迴舟溪色蒼
微浪碎冷月
澈澈烏拍枝
戢戢魚傍碣
下上明組練
誰能踴倉卒
頗懷

青房集卷之三
一
裙屐盛頓使絃吹歇危亡幾干汝俯仰意兀兀莫忘叩舷
人六代倚恍惚踉蹌攀酒墟捉鼻向戶櫺又張鼙毬宴絮
語引空咄彼姝照游龍波濤出復沒猥瞠據隅坐壘塊有
正骨

月夜譙集園廳賦

風月夜初閒流雲點屋山園空春自照客至石能頑灑落
飛吟思安危見酒顏大弨長挂壁應笑老夫孱

劉龍慧太守由海上寄贈新句依韻答之

齷齪襟裾依竈養瓦盆土銍呬羹清瞥驚江海片嶺上使
我池臺萬象明枯槁爲尸才士好媛姝相悅寤歌平漫嗟

天外鼉龍窟旁伏蛙黷閣閣鳴

上元夕步月

芳辰吾老矣顛倒向盤盂猶有江南月能閒枝上烏簫笳
困獨步醒醉入微吁門外魚龍戲探頭躍衆雛

錫侯伯弢招集淮舫

秦淮歌吹劇銷沈

爲新春歌所感無賦

來聽波喧水鳥吟兩岸

畫樓搖鬢影數行官柳長春陰渡江擊楫英雄盡拄笏看

雲樹岫深遮莫離筵起孤雁時危地小爲霑襟

臣時即還長

沙薛
軍備

雪夜張泰州酒坐贈別江叔澥太守赴廣西巡撫軍幕

春之氣悠悠桃柳芽欲迸孤城壓尺雪萬象困暴橫寒光
煤尾昏懸霽瓦溝瑩空衢捩肩穀滉漾條游鏡照水樺燭
筵錯落盤盂盛細鱸嚼脆膩大餅截堅硬四座各雄出談
舌雜嘲詠江侯撫深杯眉棱剛剛勁魂翻嶺嶠間促赴萬
里聘彼州久弄兵司牧失其柄魚爛不可收豕突欲相併
側貳況持戈瘴箐孕梟獍潭潭大讎府表裏施括槩建威
以銷萌困獸想鬪阱君抒胸中略佐下流水令元氣含瘡
痍根原究利病坐見治亂絲網紀一朝正朝廷憂荒隅
經猷在所競孰云儒術賤丰采自孤映丁甯河陽公

訓柯
義庵

中丞敢爲得士慶

酒集胡園作

城中佳勝眼爲疲聊覺胡園水石奇
碧蕊紫萸春自暖疊巖複徑客何之
閒閒簪履相娛地歷歷乾嘉最盛時
殘月樓楹魚影亂真成醉倒習家池

叔解別抵下關無江船復還因攜汎小舟至吳園晚飲酒
榭賦以紀興

江郎凌晨掉頭去快轡奔車影春樹鞅鞅投鞭復自還
江干無船波連山走書招我入大笑塵土浣面衫痕殷
一日得過又無事爲喚小舸同捻鼻千搖萬兀爭冷風
瞬息檣櫓銜水次港縫纖穿曳使前摩率憂擊聲積然
盡氣脫出

曠莽處兩眼只瞥團團天煙暝雲沈萬楊柳虎踞鍾山如
縛狗吳氏園亭花葉新倚徧闌干識儂否斜睨濠堂茅盡
揭主人去作濟時傑邊頭生事不歸來可憐溪水明於雪
人生意氣羞牛後君亦負囊恣狂走百年促膝能幾時獨
秀峯頭定搖首須臾回棹鐙光裏刀七長筵吾與爾腥鮓
大截但嚼之斟杯更勸小桃子

秦淮歌
妓名

江郎江郎呼起起

別恨懽悰兩莫比笑詛明朝別雙趾蹢躅再呷秦淮水

正月晦陰雨愁坐東季祠伯弢

晦日雲篩微雨寒模糊偃僂對蔬盤海棠未蕊杏株死獨

惹風啼千竹竿

園樹略無春意思
春風春雨爾何爲
東皇淹駕靈衣卷
幽佩尋春祇自悲

若有二子深深居
東鄰西鄰技黔驢
也知局促怨陰雨
聲出金石能和予

小魯仍用舊韻見寄兼悼余喪妹次答二首

老傍江聲祇獨吟
鬢飄星點坐森沈
懸知攬轡彈冠計
併作移山蹈海心
雄虺結盤終橫噬
孤螢開罔待相尋
春煙也暖秦淮柳
搖盡城頭擊鼓音

大雷書斷仰天吟
千里驚漚夢亦沈
苦憶牽裾號泣地
猶懸上塚歲時心
同根骨肉今都盡
飄梗江湖孰更尋
伊鬱

辱公作深語銅鋪聽滿夜雌音

雨聲

千林卷宵雨窅窅弄寒晴雲碎一春影風含百鳥聲微生
安所殉孤酌暗相驚屋角挂蒼嶺飄鳶縱復橫

短歌寄楊叔玫時楊爲江西巡撫令入紅十字會觀日俄
戰局

海澨千斛澁龍語血浴日月迷處所吁嗟手執觀戰旗紅
十字會乃蝨汝天帝燒擲坤輿圖黃人白人烹一盂躍騎
腥雲但自呼而忘而國中立乎歸來歸來好頭顱

觀日本優場雜舞

矗矗竹竿承屋椽一人插肩屹如山一兒揉升據其顛盤
辟撇掣風雹旋趾籍竿尾反側間縱軀橫伏翼兩拳銜擲
錦帕落九天四無依倚危哉艱須臾滿堂聲颯然戈壁萬
里一兒前荒忽穹冥撲飛仙翻項掀臂凌虛懸躍就一繩
臥作氈羣兒爭投恣所便頭脊尻掌相鉤攀或若垂瀑若
拖煙霹靂破柱虹飲川又有一兒勢孤竊崱巖廓落迷歸
年一兒仰足天梯連倒影下壓舞蹁躑躅葳蕤寶蓋立華鬘
眩亂變滅萬目憐嗟汝狡獪誰爲傳

春晴步後園晚望

柳縫殘陽紅草上殘陽白提攜雪色兒圍坐池邊石

園枝微欲繁野菜已可煮閨闔牆外聲人語烏鵲語
鬢絲是何物影我春風前脫袂拂寥廓晴天橫紙鴛
吾意不可裁倏與片雲暝莫忘灌園翁手斲蓬蒿徑
簇簇枯蘆堆望望霞燒處魚沫吹人魂悄悄從此去
看雨二絕句

歐西糲粥滑流匙餐了巡簷看雨絲病起孺人亦乘興開
手扶過海棠枝

枝頭浙瀝盡春聲颺作香愁護乳鶯我欲薰衣分茗汁紫
蘭花畔臥新晴

於江永汽船和答何嚶威孝廉見贈孝廉爲蓮舫太守孫

以計偕入汴

爾祖光輝動鄉國後生傳述不能忘風流儒雅又孫子
囊篋襟裾對莽蒼波暖龜魚吹沫活霄長鷗鳥破煙翔機雲
聲價尋常事肯向夷門問賣漿

江上爲司船人盧經歷題張文達畫幅

江微靈雲萬疊山晴風噓翠鳥呼閒船窗倒影畫圖裏都
在斜陽縹緲間

藹士而還又一奇嵯峨蕭瑟欲兼之可憐相國閒無累想
得承平下直時

泊九江謁壺天遯叟琴心樓一首

落船九江捩眼窺江隄綠盡萬柳黃水昏日愴拂衣履走
謁逕叟東城陴菜畦竹徑覲深靜廟樹益皎煙雨姿廬峰
照我立戶牖似笑此客忘爲誰翁聞出看掖再拜海內父
執存光儀太古襟期卽彷彿爾時意興猶淋漓立言妙諦
百無礙獨及二男顰兩眉鼎也一官繫荒徼旣服轅軛思
騰馳豫乎進退不自揆躬率子弟學四夷彼皆顛倒殉濁
世與翁所契殊參差拄杖挂壁虛室白側飫緒論還餘悲
翁復導引攬亭囿茶株梨瓣紛葳蕤琴心樓頭滿花氣飄
浮几硯薰尊彝櫻桃幾樹護絲網務絕銜啄遮鶯鷺維翁
醅德糴萬物亦用機智完恩私大江掀波牆櫓動行別翁

去翻龍旗翁但趺坐息以踵安問擾擾蟲蟻爲

姑塘雨夜

燈火浮湖嶼風波接市廛愁兼一夜雨夢落九江船鼓角
閒津吏歌吟答水仙欲呼寒月上石影壓孤眠

清明前二日阻風南康府城下

鼓輪夢寐間微覺風水怒稍久益簸掀惡浪聒無數朦朧
復睡去兩戒落何處促與雷霆鬪奮挾蛟鼉仆晨起怪安
便窺窗得港樹船人縮手語滔天那可渡隱隱南康城旁
有巍塔據廬阜蹲穹霄蔽虧滿煙霧冥想聚仙真但辨投
雁鷺其下極泱泱喧呶肆吞吐浮生委行旅對此淚獨注

我爲上塚兒，節候切奔赴而又遮遏之。九原更百慮，提挈所哀苦。終向靈君訴，叢芮響猶勁。孤尊色欲暮，輾轉拊枕歎。魂繞西山路。

夜渡宮亭湖

滿枕轟轟汨汨聲，飛舟一夜指吳城。樂公袖捲波濤去看取，珠宮明月生。

宮亭湖盡蛇首尾，五老峰留蛟角牙。應笑古來無此客，昏昏搜句煮春茶。

晴江晨眺兩岸風景佳絕

晴江安所放，冉冉倚鵲聲。亂眼花爲岸，搖魂浪接舫。好雲

妍獨慮列岫與新盟吾醉弄春影迷離數水程

清明日由南昌城渡江入西山道中二首

城郭鳴笳去沙江斂楫迎點波鷗影疾出樹鵲巢晴煙爛
千村色雷殷一徑聲披披桃柳下把卷看春耕

招手西山在雲嵐光醉人止亭公執席尋壑客霑巾節物
留斜照芳菲滿幻塵道邊長送眼花舞紙灰新

靖廬牆下所植花盡開甚盛感歎成詠

靖廬完完冠小山幽築適當墳右偏倚樓原阜靜眼底指
畫空泣瀧岡阡女牆外環隙尋丈豁如臥釜形橢圓畦分
一角糞瓜菜餘皆花竹滿其間常年寒食在花下或蕊或

盡或開殘那際茲時花競發喧風暖日搖空天紅白桃株
最澹澹火齊瓔珞光屬聯雲烘霞起籠四野中來縞袂攜
手仙海棠兩叢凝雪色垂鬟嬌立嬌且嫋游蜂浪蝶不得
嗅相與蕩漾靈吹還歷歷阿爺手布列始盈掬耳今齊竿
生世糜軀殉黔赤娛老未及持觴看祇移大竹飽煙雨宵
辰頗聽摩琅玕孤兒瞠視眩今昔掩藹酸涕增汎濶嗚呼
安得追攀魂魄流賞久躑躅然後鳴佩扶蓋從飛翾

墓上

短松過膝草如眉絲麗川原到眼悲叢棘衝風跳乳雉香
花搖雨濕蟠螭歲時僅及江南返禍亂終防地下知弱妹

勞家今又盡茫茫獨立墓門碑

晚眺靖廬外諸山

暖芽綠徑亂枝紅
颺髮疏疏溪谷風
獨響巾車答蛙黽
晴鳩西喚雨鳩東

繞盡雲邊破碎山
吾家二塚在其間
殘陽萬古不吹去
暗

數蝸痕掩袂還

弟婦兒婦塚相距十牛眠許相

讀侯官嚴氏所譯社會通詮訖聊書其後

悲哉天化之歷史
蝨於穹宙甯避此
圖騰遞入軍國期
三世低昂見表裏
我有聖人傳作尸
功成者退惡可欺
蛻形范影視鑑捶
持向神州呼籲之

廬夜風雨雷電交至晨霽倚樓眺西山作

夜中屋瓦金鐵鳴碎訇礪礪海水傾赤蛇搜壁鐙火滅拊
枕肆兀心膽驚晨醒揩眼披衣出階桂鮮鮮映窗日鶯燕
嬌啼蜂蝶還吹送殘香溫我室獨倚樓頭擲酒卮花光破
散嵐參差人生頃刻不自保嗟汝憔悴猶橫枝君不見西
山照地騰霄舉翠壁青蘿洗雷雨謝公游屐安可攜
龍蚪色如土

樓坐戲述

城市閨興儘山中喧蟲鳥併百千萬音沸向樓頭繞陂田
盡蛄蛄游蜂亦來攪烏鵲雖雉外布穀黃鸝好牛犬聲蠢

蠢豕喚鵝鴨惱鳴雞在鄰牆風雨尤自擾豺狼有時啼悲
風振林杪蒼鷹爾何知逐鳩下鵝爪我欲洗心坐冥合萬
物表樵歌又四起牧童和未了何況溪澗流斷續滿懷抱
一笑謝巢由勿爲世人道

別墓

回回田水鳴濯濯山花醒五日拜春風暖我石上影
平生無可了祇有淚縱橫千山壓人去處處杜鵑聲

瞻園讌集次抱冰宮保韻兼呈花農布政

瞻園風游憩所獲祇尋尺水石自嶽崎悵未闢榛棘立度

擅名理回首五千日

己丑夏曾留瞻園一月
時許仙屏丈爲布政使

不忍問琴鶴

何期煥廊壁往時數行柳鋪作垂天碧
雖禽呼上下似怪客初歷花下坐人豪
光風灑前席許謨抑深念聊此數晨夕
圖畫出筐篋頓使精靈辟標識記誰某
忤慨頗交集茅椽冠陂岑萬象瑩一隙
甯知閭閻喧初爲江山惜壑壑使君賢
政成溫釣石勝日續壺觴寤接耆英跡

燕子磯奉和抱冰宮保同游韻

轟艘競東下有如羽差池抗手波濤間
遂捫燕子磯巉巖爪觜出谿筍張兩頤
千山作簾幙一道明琉璃客來恍驚顧
奮欲淩風飛矯首嗟歎久刈滅遷人詩
形勝自古然乃與世推移蠟屐掃唐宋
鐵鎖迷梁隋

磯後石壁尙置古鉗鉗半段

遑云

拒門戶據爲霸王資元老散沖襟物理孰成虧賓從答呼
嘯獨以藍輦馳磴道上危亭曠覽無町畦飄髯煙靄際真
賞誰從知茫茫白鷺洲歲漲挂流尸指點力鏜卻仰天噤
莫施勢會緣所積睥睨空自奇憂樂寄邱壑後賢應念斯
顏日弄形影孤筇安不危摩挲龍蛇字飛白留殘碑盛隆
戒苞桑奚由贊一辭還拂遠峰色古愁攢客眉

爲二絕句

柳岸圍鐙雨打船河橋新漲晚鷗天攜來捉鼻二三子都
換滄桑到酒邊

倚醉飄愁不自知吳娘絮語已多時二千年在絃歌裏今夕秦淮果屬誰

贈許苓西觀察

矯矯聲譽許子政頗從人口播家風江城荒犬能相過身手驍騰孰與同祕策憂時塵篋在孤檠呵壁酒杯空何當載向瓜皮艇射鴨江湖兩禿翁

園居漫興

荷池蛙接砌蟲分風滿虛廊隱几聞對酒縱橫牆角雨移涼破碎嶺頭雲老夫所殉與終古當世猶稱善屬文獨映紫薇緩襟佩細蜂閒蝶已紛紛

喜實甫罷官至

隔年再面剎那頃萬里一官歸去來能外死生偕醜妾稍

憐簿領試邊才

君刊有龍州雜俎三卷

解人畢竟數黃祖名士猶堪

始郭隗藹藹江南歌舞地笑攜蠻石對深杯

寄調伯弢高郵權舍

星夕蠶辰颺畫船依然歌彈滿山川離人應爲雛髮噉爭

說猷瓜笑欲顛

吳嘯相嘲曰猷瓜

聞道津亭傍勝區唱籌擲鼓將髭須露筋祠畔千帆盡稅

到江頭鷗鷺無

立秋日得叔澥由桂林還姑蘇所寄書卻寄二首

飄旋海宙一飛鷗獨出氛埃飽看山始挾奇情問孤注今
紆至計勒諸蠻瘡痍成國迷桑土烽火餘生脫鎖關鴻雁
書來下池館秋陰千里寫君顏

有客踴踴攜妾至

易賓市由龍州解官過此

嗟君莽蕩抱書歸人生得

失定誰是老去聲名未可非嶺嶠虺蛇猶照夢江湖鵝雁
感長饑板橋煙水堪忘死延仁歌呼拂芟衣

寄姚叔節

荒茫已負三年諾偃蹇猶淹一紙書天地精神自來往江
湖意興莽蕭疏盛秋叢箐方遮寇橫舍諸生或起予貧馬
蹴髑髏驥櫪昂頭任笑技黔驢

同劉達泉易實甫沈小沂汎青溪看雨

羶雲吐日晝炎炎屋底儒冠喘汗兼競踏輓塵照淮水俄
成飛雨映湘簾捉襟狹艇同雞鶩倚檻嬌鬟似鰈鷯繞郭
穿橋指隄柳雷聲初起萬峰尖

胡研孫糧儲招集適園賞盆蘭初花作

初秋風日纖埃開兀隨鈴馱尋池臺適園綠陰萬木合雜
英落盡鋪莓苔鷗吟鵲語靜白晝嘶蟬颯颯搖古槐嶙峋
醜石蹲獅豹使我眼目還驚猜主人品茗置精舍二三詞
客聯翩來牙籤錦軸照戶牖各發藻豔追蓬萊笑指盆蘭
槎几側素莖秀出葩剛胎煙浮香動影枝葉釵箭晻藹同

安排鄰牆蜂蝶不敢到皎皎孤映輝瓊瑰自昔幽人愛寂
寞淵明高蹈靈均才何如大隱齊萬物華堂視作荒江隈
當門叢桂亦芳鬱凝眸垂手重徘徊詩成顛倒被花惱待
攜涼月傾金罍

納蘭容若小像題詞

拓戟門楣椒幄親過江風貌照麒麟微憐開國射雕手喚
作詞家第一人

博得吟身絕塞還毘毼杵臼氣如山傳經心事無人識偶
列後堂絲竹間

弱冠才華 禁籙知芝蘭不數謝家兒至今瓊醕思公子

都唱當年側帽詞

漢家無復獻長楊
鳳凰鸞叱事事傷
終覺育長影亦好幾
污煤尾數滄桑

漫題豫章四賢像揭本

陶淵明

此士不在世飲酒竟誰省
想見詠荊軻了了漉巾影

歐陽永叔

道喪文亦敝踵韓挺作者微
茫通波瀾獨餉百代下

黃山谷

駝坐蟲語窗私我涪翁詩鑱刻造化手初不用意爲

姜白石

辭賦麗以淫如翁安可得一卷蓑笠前國風有正色

七月初四夜與濮青士丈及格士移舸納涼賦

小艇如鳬驚橫眠看拍浮按歌飄水細倒影接鐙秋酒袂

初乘興風簾暗落愁老懷瀟灑極飽飯動閒謳

震也天童返猶餘松檜秋海潮通一水茗坐更孤舟嫋嫋

雛鬢出依依清夜游橋頭隔人世曳履向沙鷗

王聘三太守招游莫愁湖集者凡十人賦以紀興兼贈王

別

豸衣猶浣 帝京塵幾日江南賸此身初看荷湖滿紅翠

閒移茗椀照城闌
鬢邊欄楯龍鸞影
花底精魂蛺蝶春
應

向硯池憶雙槩

君以侍御出守撫州

須臾同作太平人

偕實甫步月過研孫

纖月籠馳道
高城接亂笳
閒尋傲吏語
初避晚烏譁
虛室香籤軸
清吟棄土苴
燭花親二客
疑到子雲家

月夜

一片柳梢月
還爲居士來
砌蟲秋自滿
園鵲夜相猜
閒坐成滋味
殘編且闔開
遙憐照烽燧
海雁亦飛回

荷亭坐月作

新月又池亭
秋痕拂袂青
水明荷葉大
煙冷竹叢冥
河漢

低穿蝠闌干密聚螢孤斟警鄰柝華髮久飄零

孫師鄭吏部由京師寄所刊文集并附詩三章見贈次韻

卻寄

誰信風波有戮民流涎齏齏唾承塵乍驚燦爛搖窗冊恍
接平生送酒人獻賦淵雲驚省重賡吟岑杜鳳池春海濤
捲盡旌旗影電火燒天眩一鱗

潛郎餘事喜稱詩獨覲微茫狎險巇莽莽百家舉杯盡堂
堂萬古入鐙悲祇今城闕迷胡服賸託瑤華詠楚離猶盼
安危券帷幄委蛇退食佩聲遲

縛書爲枕鳥呼關舉世流傳老子頑萬里何期同寤寐一

緣聊自傍湖山低昂國論憑張目湔被人羣且破顏日把
高文照雲物 帝城回首舊鵷班

聞熊秉三太史抵滬將爲日本之游占此寄之

憂患死生同一擲微聞騰刷脫羈鞅熊熊猛氣故常在蛟
鰐腥波相與長嚼血噴天成慘澹蓄眸觀世費評量江南
老我蠶鹽裏東望求仙涕數行

臥病

臥病依疎雨秋高意自悲對牀斟藥裏切牖暗藤絲蟲語
從移世蟬聲欲老誰微呻赦鐙燼殘夢亦何爲

秋雨初涼病起作

顛風飛雨掃江城併作喧荷墜葉聲起撫亭臺知雁去坐
依書冊善蟲鳴支離皮骨涼花氣勃鬱肝腸照酒觥遮莫
懷人數簷滴垣衣初長砌苔平

黃澤生

忠浩

承

詔以候選道改授狼山鎮總兵喜故人

始膺殊典根觸今昔述爲斯篇

我初識澤生予于長沙市短小精悍姿蓬勃拳霞綺城南
校經堂鐙火羅髦士文學富穰穰呻呶就案几談兵好大
言君與杜五耳

開杜雲秋

而我相諧嬉顏顏誇爪觜遮邀每晨

夕飲啖恣睥睨東街買豚蹄西市斫魚尾南園供瓜蔬北
巷除醬醢滿堂八九人謹叟翻甕螳或爲鴈鴒舞或效獮

猱跪或擊劍破柱或灑墨浣紙被醉踏廣垌明月如潑水
雜沓據樹石錯亂排泥滓君時赤雙頰仰天立岌義飢鴉
啄其頭眼眇髮盡指扶掖到敝廬倒枕貯尺咫中宵映燭
坐謝我謂幾死薑茗點腸腹掉舌更拊髀指畫格鬬狀捕
盜同捕鬼戲呼王璞山韓刀跳鄉里不然溷伍伯當官堪
典史大笑億千場歲序流電駛杜旣西入蜀持藁駐一旅
旋領江南軍控帶環壁壘君於甲午後憤慨足摩揣亦起
糾隊卒受隸鄂岳使先公鎮沅湘移君資扞抵增募二千
人郊郭屯虎兕侵尋十年間黃杜聲隆起旌旄望江湖氣
勢掃穢秕海內口兩雄號爲知兵矣桂嶺久搆亂瘴簪孕

蛇虺出沒肆攻剽崩離壞綱紀兩帥躬持戈合圍收折箠
戡定見端倪兵叛又誰止連陷數郡縣所過盡掠燬黔湘
層齒邦勢欲決垣堦果厘南顧憂援師徵十倍杜黃同被
命疾趨摩甲鎧遮杜扼永郴君獨入腹裏裹糧越崎嶇
六月嗟勞只俄頃關穴中殺氣騰砂礪飛礮碎酋胸賊衆
遂披靡說說一書生昨死遇觸觝九重嘉勇功重鎮等
賜履酬庸安足論異數劇可喜國家積弱由萬轍非一
軌敝制極不返文武分途始儒吏束手爲將率益偷鄙鹵
莽而睢盱遠云襲歐美方今窮無之品彙在礪砥酌劑破
藩籬因君爲嚆矢我聞雜涕笑發視臨駟兵法百十家

蕩蕩學之海精能通鬼神取諸其鄰是所願應運興淬厲
雪國恥剗鉏驕吝萌益進探根柢回易舉世慮爲仁信由
已天地有與立庶幾兆端此叢蟄聽疏疏高鴻去邈邈老
嬾將寸心且持訊杜子

送沈小沂舍人入都

喜我平生攜手人歌船鐙館得相親十年江海搖懷抱萬
劫沙蟲入笑頻玩世文章灰欲滅射天弓矢夢猶新重尋
金馬銅駝地應有卮言動薦紳

謝荅西觀察惠蜜酒杏露紙菸三物

疴癢得解尙骨立把玩長日如小年使君篋搜海市饋

我環物娛細甍蜂房割蜜變香釀杏顙蒸露浮汞鉛沁脾
不減九醞美甦肺劣比三危鮮捲菸束紙出夷製竹筒一
呖適且便酒闌飯了起捫腹噓吸沆瀣翻雲煙頗怪謠俗
恹嗜好漏卮坐令輸金錢屏軀親遺藏屋壁勝賞取對秋
蟾妍

雨中東季詞

秋光不受縛決驟作飛雨園木與枝梧暝煙垂縷縷照簷
紫荊花殘紅聊可數池荷比敗蔬狼籍倒甌觔烏烏食其
巢壁蜚聲相補節物亂酸腸萬緒慳一吐猶聞闌蛟蚪益
令伺豺虎伺奴斷右臂蓬萊失左股殺機到寢薦隱軫指

畫肚念我養疴人獵德翳環堵繪絮裹羸形寒薤映菽乳
幼安有皂帽曼倩辨黑土汲古從迷邦誰爲貯辛苦吾不
知許事尋源弟一祖

題李梅癡太史所畫扇

杯添野水罷支頤掃出婆婆陰畝枝萬仞青天鴉點點爭
棲夕照擲人時

中秋夕作

江南明月年年好笑問今宵月上無雨脚猶銜城郭影牆
頭初亂雁鵝呼兒童析餅親鐙燭漏刻煎茶點酪酥人境
漫依蜚蚓換蘿陰結襪立踟躕

爲濮青士觀察丈題山谷老人尺牘卷子

我誦涪翁詩與瑩出嫵媚冥搜貫萬象往往天機備世儒
苦澀硬了未省初意蠡迹擗毛皮後生渺津逮書何獨不
然筆法摹訛僞九州炫贗本蛇蚓使眼瞇巖榻亦損真略
具銀鉤勢望古忝邑子遺墨期構致鄰寺守傳幅號稱小
三昧髻髻轉郡國坐失摩挲地屬聞散人家居奇千金利
濮叟騷雅宗襲珍辱持示阿誰乞伽佗想見娛遊戲風日
發光妍珠璣蘊溫粹宛窺虞柳全漸拾幾獻墜鋒銳斂沖
夷乃副儒者事取證內外集波瀾與莫二得此誇家雞政
爾適寤寐後有五百年永寶十行字劣詠污敗毫憑叟哂

以鼻

送趙仲駿觀察權鹽宜昌

趙侯海鶴天馬姿排霄羽翮雲馳十年讀律工說詩且
三折肱號良醫胸中水鏡貯妍媸曳履挾策世莫知鄂王
城頭好風日覲面執手驚權奇觥觥去作黃州夢雪堂坐
對江山悲龍蛇起陸鯤鵬徙君亦應官羈國士聲名籍甚
淮淝間漫笑鸞鳳棲棘枳亡何嶺徼煽干戈又隨邊帥負
弩矢盜蹤未滅轉益熾吾謀不用奈何彼引還結舌向江
南大府虛席篤行李文書填委竭計畫中外觀聽持綱紀
旦暮不耐勞苦爲子役出充權鹽使夷陵西接千萬山好

逐猿猱狎山鬼攀藤倚石騁游賞醉翁吟魂呼尺咫自云
世變日紛騰和扁無術與起死老去得錢安所用償債畢
便歸田里祝融之麓瀟湘隈可以罩魚可牧豕拈句沽酒
長兒孫堅臥繩牀忘甲子趙侯趙侯言在耳我私趙侯爲
欣喜小草遠志浪比擬莫緣蒼生一拊髀

贈張伯琴太守時居江南總督幕府

潭潭公府萬鳥喧騶騎臨過有閉門正值呻吟得暴下便
成偃蹇避高軒撈珠海月荒唐夢獲稻湖淤夙昔言濤浪

拍天好歸去果園風物對秋翻

君宅畔園富果植
因自號果園居士

恪士招集小舫泝流至西方寺側縱眺客爲濮青士仇繩

之兩詩叟趙仲弢觀察及余凡四人

利涉橋頭黃蔑舫雨細雲昏迷所向窺窗踞坐一禿翁

謂滌

至叟先

篷底捉袂忘揖讓墳索撐腸奮談舌主客續至逾神

王當筵鼎俎供行廚醬牛炙鴨佐醕釀我病止飲但快嚼
盡掃數器各引吭飯罷腰腳苦拘攣移棹歌呼就遐曠樓
臺弄影簾幙垂溪風漠漠斷絃唱沙岸柳行相蔽虧籬壁
豆花有飄颺鑑園濠堂是何物門前贏得魚大上折穿狹
港跨石梁競聽波聲投甕盎西方寺插叢塚堆眺覽荒忽
窮諸妄披襟脫帽走且僵談詩說鬼興無妨迴看鷗鳥帶
城陴巧挾巖巒作帷帳只憐陰蟲滿四野蒼翠潑眼暝煙

漲尋常裙屐慣招攜老輩絕倒茲游創異時指取山水窟
摹記一二恐難狀

爲魏公子題李芸父水部畫幅畫有竹石芝水仙

綽約處子凝雪肌瑤枝玉朶神草奇蔭此竹根太古石冥
挈元氣灌溉之吾鄉水部好筆力割取溪藤染霽色靈飆
瑞靄無時無留映君家翠螺壁

贈別梅庵經蘇浙入閩

阿梅德器見溫醇弄筆窗光物物新自許好游成辟世稍
傳不娶正驕人寶書百國斟孤抱冷月千江寄此身明滅
鯨鯢橫馬尾海濤點髮漫沾巾

桂

堂前小桂樹也自發花枝窈窕微香亂暉暉斷雨悲隔欄
迷蠹粉插鬢冷蟲絲尊酒無情思爲看出屋時

重伯自京師至金陵相見題贈此句

矢溺擣蒲道有根兩年大隱在金門手捫蟻蝨聽車過目

笑蛟鼉據海尊餘吐星辰三尺喙孤成河洛一家言君新
成算

術許說甚創自江南兒女還相語科跣騎魚是夢痕謂辛
丑歲

金陵大水君
跣足奔視事

神雪館聽琴

天人窈窕發冰絃寂籟微茫古莫傳二十三年彈指盡紗

窗樺燭一淒然

驚層巔兮挂石袂猿狙叫嘯鸞鳳翔令我縱意狎寥廓看
君扶病聲宮商

饒石頑舍人招飲金陵春酒榭至則重伯實甫已逃席冶
游戲爲一絕

烏銀刀七白魚肪坐對模胡汎一觴簾外西風絃索冷憑
渠打鴨起鴛鴦

次韻答寄禪上人海上見寄

碧湖花雨照迷津十五年前挾老筠

客湘時屢與郭筠仙侍郎諸公同集碧浪

社湖詩

石火光中吾未死乾坤毀後汝何人

縹緲潮音倚雁聞樓臺歌嘯隔霾氛虬鬚白足自來去想
得袈裟生海雲

秋晴園景絕麗散步有作

隱几無餘事開門祇自賢池塘浮鏡暖亭館洗秋妍細蝶
晴能數飢鳥下可憐閒吟尋履迹用意與誰傳

北渚閣次韻和伯琴太守閣爲藏書處

渺渺愁予安所放咄嗟臺觀控溟濛蚌珠夜護雙湖月鷺
吹晨邀半嶺鐘雲物擎杯開窈窕牙籤環柱映璵璠拂衣
可預聲聞座領取伽黎一臂風

靈隱焦巖小洞天購書幾見乞僧錢憑欄數盡南東畝蹻

屢來探星宿躔一水鳴鼙騰暎誦萬家買犢負當年

先公撫湘

經畫壘湖
事未竟

揚靈恍惚雲旗出鑿空扶衰賸汝賢

木葉亭次韻答伯琴

葯房蘭橈杜衡煙石瀨飛龍儼目懸望古襟期聊自媚吐
山歌唄一相憐五峰散霰明秋髮萬葉搖波夾綺筵定有
佳人憶江海騷魂吹盡薜蘿邊

文芸閣學士同年挽詞六首

病起看雲過書來對淚垂

八月二十八日得王
木齋書報君噩耗

車船初躍

去骨相亦奚爲士有摧傷死天餘慘澹窺還家渾是客海

色引孤兒

君之子公達
方稱上海

握槩隨鄉隊鳴鞭蹴國門狂言人盡避大嚼日相存江海
空能返魚龍不可捫當時矜爪觜兩兩倒歌尊

果慶得人盛聲名爲帝知張華陪禁近陸贄職論思感
激維危局蒼黃斬亂絲獨憐顏咫尺瀝血摘奸欺

元禮終亡命邪卿辱大儒孰傳鐘室語幾索酒家胡禍毀

機先伏煙濤夢自孤光芒接三島

君什游日本

留得口中珠

流略久湮淪羣喧妬道真校文向敏後隨筆孔洪鄰雙樹

從微喻孤篷更暫親枕中宗教記搜證恐無倫

今歲四月與君由南

昌同舟抵金陵得閱所著雜記
中有述宗教數卷可謂奇作

陳次亮劉鎔仲恨俱逝汝亦蛻江山鄉國數羣彥緇塵懸

舊顏仰天成
嚙晴託世化
戎蠻衰疾吾
安適含悽祇
閉關
戲貽寶甫

鼎也無官復
無食往還蹢
躅見顏色口
熟棲霞不肯
游眼
飽秦淮聊自
得白日按劍
忽掉頭去釣
巨魚醫蛟蚪
海水
卽今污腥血
爲掃匡廬萬
壑秋

哭胡糧儲時
以從役歿於
姑蘇

半塘蛻去

王給諫
純常死

廷文學士

海內詞人

日寂寥江水

更悲長不返
秋聲如訴苦
相招青雲垂
上窺魑魅白
社分
題隔暮朝被
服風流從政
美江南應搖
鶴歸謠

同次申擎舟
至毘廬寺迫
暮不得入眺
還飲酒樓旁

死喪惡耗滿懷抱仰屋支牀日顛倒出門喚漿寫我憂一
道青溪爲誰好游舸數點氣不驕管絃零落喧呼了何況
陰風慘澹吹夾隄楊柳絕啼鳥毘廬寺隱鍾山陬穿盡三
橋林木幽窺窗捩柁苦昏墨微見佛火搖鐘樓我倚虛空
一針杵踟躕不得尋僧語古來乘興王子猷轉船忽忽同
竄鼠薛侯微歎尋酒樓繫纜其旁呼醪羞蝦蟹魚雞具盤
盞齷齪果腹還垂頭誤促一髮落飄絮雨色波光對箕踞
人生萬事觸虛舟不笑不歌亦撇去
九日憶去歲與小魯伯弢酬唱感賦

健者飄零不相見涪翁此語最可悲去年開尊作重九三

人含笑各賦詩饕餮據案割牛櫛閒暇炙炭燒伊尼解箭
鋒機騁狡獪往復謔浪無不爲祇今黃花又漚漚天高日
暖螯孤持黃侯縮手對江漢坐聞戰鼓掀霜髭抱關陳令
攢眉去壁社空搖助餉旗我復累月臥不出負疴服散存
骨皮登山臨水付歎息雉堞咫尺亦嬾窺天運回環一周
耳眼前光景成參差世難益迫人益老采菊漉酒真吾師
安怪陶公惜此日欷歔千載非所知孫盛作嘲孟嘉答一
時意興今何誰

至下關望江憶往歲與實君別處

馬蹄二十里柳陰蹴塵霧搖搖車中魂徧挂所歷樹疏鐙

指江館行李倚欄具乍奪窗榻涼黯接城郭暮憑欄望波
濤樓船散覺鶩鏡吹夷歌起旗纛神廳怒市門喧賣漿荒
岸引閒步飛橋翳亭屋曾別佳人處歲時鳥翼過顙唾蛟
涎汗依稀月下顏緬邈天邊去留語暖我腹平生此舊故
道德負初心衣冠況孤注狠持衰疾軀蹠蹠候津渡拂襟
零露新江山有餘慕

侵晨登江船雨望

扶雨到江江欲迷疏煙薄霧岸東西一身自逐波濤上慚
愧城頭亂曉雞

窈窈寒流爲照顏年時皮骨不勝孱船窗臥對白鷗下暗

數雲中千萬山

江上從船人假閱報紙有別士酬君遂惺庵諸什蓋與寄
禪上人前作同列入平等閣詩話者也根觸舊游率爾
成詠

兩鳥猶聞一處囚流傳故事到孤舟寄禪句有煙霞癖別
士襟涵海水秋佳俠誰憐朱郭在藻梁聊數惠莊游江鷗
欲下魚龍寂魂斷樓臺天盡頭

由九江夜趨湖口

五老看人往復還風濤百里兩三灣石鐘祇在竿鐙末傳
粥煙蘿僧夜閒

旗鼓山城氣益振鬱葱古翠散湖唇坡翁負卻九華石欲
起當年李正臣

渡湖望廬山口號

誰擲青天臥作湖晴雲嫋嫋鏡中呼斥仙浪向匡君語身
是持杯項曼都

指點淵明家上京

去上南京爲陶公舊宅
城南數里許

墟煙猶帶白鷗橫

眉別有醉眠處萬古孤篷浪打聲

過望湖亭

去船丁丁斷寥廓回船丹青籠傑閣

落成改造

會有鸞鶴下

仙靈冥引湖江納橐籥四十年間父老盡濁酒依稀聽鼓

角日斜孤客不敢登恐見萬鳥眼中落

王家渡

猶記一枯樹風波得繫船霞燒山盡赭沙淨月初妍饑鷺
銜魚過歸鳥逐雁懸閒閒認秋草祇有夢如煙

過簡叔季廉宅

熊氏好兄弟深居出萬喧寤歌魂自闕久別道能尊物象

探籬壁天人了語言相將徙鵬海

簡叔將游學日本季廉以從師亦移居上海

余意與飛翻

喜芟老自豐城至次見贈韻

稍聞病肺枕江居過我依然健鵠如瘦骨蒼髯支傲吏破

輟荒肆購奇書卅年涕笑挑鐙盡百里風濤中酒初城郭
添公作吟伴屋山鷗喚雨疏疏

送別王湘綺丈還里

孔席不暖意何如老子猶龍自卷舒狎玩三千六百鈞歸
去七十二峰居霜鬚黑髮顏敷腴神明上燭牛斗墟致爽
樓頭望楊葉

楊局樓初成公題曰致爽知公笑口對春鋤

送嚴幾道觀察游倫敦

舖啜糟醅數千載獨醒公起闢鴻濛撫摩奇景天初大照
耀微塵日在東聊探匪驪向滄海稍憐高鳥待良弓乘桴
似羨青牛去指點虛無意未窮

送饒石頑監督出游大西洋諸國

裹糧莽蒼欲何之手挈兒郎學四夷
拂袂樓船移俯仰探源星宿極恢奇
蛟魚島嶼虛三窟蟻蠶種穠又一時
旦晚晶杯添海水獨憐合眼認龍旗

十月二十七日江南派送日本留學生百二十人登海舶
隆寅兩兒附焉遂送至吳淞而別其時派送泰西留學生四十人亦聯舟並發悵望有作

風虐雲昏捲怒潮東西樓舶競聯鑣
忍看雁底憑欄處隔盡波聲萬帕招

游隊分明雜兩兒扶桑初日照臨之
送行余亦自厓返海

水澆胸吐與誰

酬陳子言

海角詩人陳子言苦吟欲使婦無禪生天靈運妨聲病接

座深公探道根

謂寄禪

潮汐魚龍千劫過壁籬蜚蛭一鐙存

垂垂頭白收煨燼幾及黃壚倒酒尊

滬上舊茂源酒肆有佳釀穗卿叔雅君遂

諸子時過醉其賦
唱酬名曰後黃壚

臘月二日到靖廬作

維歲迫節候幾掃墓門石獨負至日觴夢魂冷程驛惛昧
徇所圖猥矜鑿空役江海弄狡獪千慮哂一得引還灌嬰
城投間脫偃仄立渡睠龍沙攀叢接鳥翮到山夕陽亂衰

草步歷歷嗒然訢重冥儻訝存皮骨宿疹侮頽襟微尙矧
敢必弔影松楸下曠古付繼述昏鐙攬晴廬慘澹立四壁
初有舍人婦暴卒就窀穸嫁婢又死去孤雛寄之食平生
歌哭地於汝見顏色萬運互迴斡祇勞中怵惕宵起緬岡
原茫茫嵐霰白

夏午彝編修將去南昌入秦維舟江岸乃與王湘綺丈同
訪西山中道分失午彝獨攜愛姬宿嶠廬賦詩留餉時
距余至三日也詩句高妙欣慨和之

靈山閼幽局丹翠恆挂眼仙侶江上舟發興肆游衍曖曖
日能溫泠泠風欲善嵐氣錯金光層累貢雲燦如何七聖

迷腸與徑百轉翰林獨冥尋
逶迤蒞荒館涼檠掩孤歡
高廊切雙璣盪此六合胸
川巒赴簫綰睹聽盡虛無
化機自溜盥照耀凝雪姿
草葉餘婉變鬱紆奮高唱
了了天人顯養空孰成虧
同異道所踐想像稚川翁
振嘯對偃蹇

綺丈誤入
葛仙潭

山中徐翁程翁過談春時相與課種桐茶桑之類苗皆數寸桑且有長如人立者山民漸知其利系以絕句

百里川原擁戶庭曾從父老課農經
白頭枉自逢新政博得荒山數寸青

阿耶馨頰滿山阿早計綢繆到笠蓑
他日思量誰活汝墳

頭大鳥樹婆娑

二十三夜嚮晨睡中聞雷起感而有述

廬夜了衆喧昏釭引熟寐山氣蒸枕簟魂暖卻魔魅揭帷
窗微明桂葉影綴綴砉然大聲起萬輛蟠宵際雞號屋瓦
搖雨風挾俱至濤籟從奔飛如海浮一轡斯役雜驚叫震
撼併失次隆冬愆潛藏發亂陰陽氣其兆爲殺機孰云地
可避災祥吾安稽顙倒却天意日中循樓廊松竹未改翠
駁解雲光亨變滅亦游戲至人號不迷緬巖掣遐思

雨霽樓望

天表回雷雨尊前數檜楸拂樓明疊岫暖鬟挂殘秋村狹

雞聲聚陂荒虎氣留

山中時
苦虎患

騎鸞何處所雲外動樵謳

望夢山

幻葉昏林夕照閒靈旗縹緲萬鴉攀癡兒遺卻邯鄲枕日
日樓頭望夢山

樓坐日暖時見山蜂飛游

山暖蜂相照林深雉欲高春能留太古天自養纖毫巖壑
光初定田園意亦勞溫風到杯酒分去作松濤

行野觀天際羣山

天龍蟠屈騰長虹萬千鱗鬣爭爲東尻高首下下飲海金
糝綵仗空濛中我翻衣袂視日色目眇魂煢坐崩石安得

騎氣與之游枯藤盡掃造化迹

紅樹

屋頭合抱數紅樹倚榻窺窗儘飽看今歲霜重猶蔽瓦昨
朝雨洗更如盤雲霞爭共斜陽色樓閣初籠野燒寒苦記
老人扶箸笑珊瑚瓊珞照加餐

廬夜漫興

明滅檐牙挂網絲眼花頭白一孤兒行觴據案犬仍熟累
夜趺牀鼠不知手布山川聊自笑

謂近規畫南
隣近道事

躬耕邱隴

定何時長成桂樹傷懷抱起視橫窗三兩枝

雨中去西山二十里至望城岡

羣山遮我更無言
莽莽孤兒一片魂
高下煙霏飄鬢髮
送迎負擔自溪村
影篴禿柳猙獰出
喧屋攢楓向背翻
越陌度阡同夢寐
望城岡外雨留痕

長頭峴道上

峰峰葉葉萬雲堆
親訪靈仙撒手纔
晚雨祇今原上路
無人知是看棋回

初添野水浮牛鼻
還認炊煙護豕寮
小市依依曾一飯
車聲人影第三橋

自西山還城館誦真長芟潭唱酬之作次韻奉和

返自窮山猿狖居
稍參法喜對真如
驚人且許耽佳句
好

事猶能讀寶書流轉江湖烹茗共綢繆鐙火據梧初雲龍
郊愈吾兼羨誰謂今人用意疏

次韻陶伯蓀見贈

爭席幾同陽子居當墟漫隱馬相如待逢百鳥與呼酒時
送一鷗能借書鄉國暫憐裙屐盛江山已負嘯歌初當今
公卿不揖客笑數湖隄僵柳疏

江干別芟老還豐城用前韻

估舟蟻聚伏蝸居覓到竿鐙意豁如夢寐猶傳鷗外語兒
童隨習蟬行書

芟老一兒一孫
城習西文今挈去

古情已逐波濤盡杯酒

無忘桃李初更待靖廬作寒食留光巖壑屐痕疏

泊雞籠山聽雷雨

殘夜仍雷電孤舟自笑顰移來千嶂雨釀作一江春
闐闐經淫氣鄉關認此身烏啼指城郭同是夢中人

過湖口有懷諸真長客縣令所

纖雲篩日暖如春鷗翅鳬翁對對新帆外石鐘籠窈窕尊
前五老接溫馴滿懷治亂能逃世弄影湖山覺有人放溜
扁舟不相待空勞風起問青蘋

泊九江晚謁壺天遯叟

松蘿別徑少城東微雨籠鐙造佛宮南斗之旁存此老廬
峰相視更無窮一椽醞釀丹鉛氣萬化推移妙徼衷江海

不煩招軾轍

時實甫客鄆禾邇山

鸞驂鶴唳在虛空

鑑園園客蔡雲卿之婦張仰藥殉其夫主人爲徵歌詩張

之是以有作

鑑園饒水木清曠一隅勝匪惟主人賢園客共恭敬引灌
鹿車旁洒掃待花徑奄忽朝露危其匹仰藥殉翔鳥爲悲
啼飄葉雨成陣主人烈此婦撫歎徵贊評方今倡民族衽
席維泮渙蚩蚩昧經教萬迫詎一應甯意荆布間勇決無
遺算情天自嫪愛乃以順性命扶持靡他私立國資後勁
茲事獎方寸尙冀知者聽我來坐疏林恍惚影蓬鬢松梅
鬱寒姿淮流對如鏡中激怪變腸熟睇孤雲淨

哭范肯堂

搖搖榻上鐙海角相諾唯羸狀雜吟呻形影共羈旅嗟子
淹沈疴倏忽篤行李飽聞絕域醫滬濱頗挂齒謬計石散
力萬一疾良已子果用所言擗拏叱神鬼初來奮低昂稍
久勉臥起云何別而月天乎遽至此歲暮轟雷霆但有瞪
目視疚恨促之行顛躓取客死又幸保須臾絮語落吾耳
殘魂今安之荒茫大江水

江南號三范子也白眉良早歲綴文篇躋列張吳行承傳
追冥漠墜緒獲再昌歌詩反掩之獨以大力扛噫氣所摩
盪一世走且僵立造豁機牙衆派探濫觴手攬橐籥灰緇

此萬怪腸慚汗視故技入荒恣舉揚永夜鬱自語摧燒篋
中藏愚闇退抱蜀几案引嚶嚶子亦笑相謀鐙火逐評量
嶠岬放人世孤感依微茫鄙事得熙怡坐對髮蒼浪敬禮
復不待餘生信俚俚

通州彈丸耳名以張范輩張氏營實業農商炫區內范氏
專教育空拳辦茲事子當寢疾甚喘囁懼失墜彌縫挽天
亡辛勤扶士類其精貫物變下牖無窮世顛颺掃萬靈姝
姝垂文字親朋日去眼吾衰常有恃維嬌學東瀛實子所
愛壻家兒與驅駕儻副銜木志一事愧未能李漢序韓愈
賀甫由閩寄新刊詩卷次其卷中與陳弼庵開學師唱酬

韻卻寄

暉暉一束詩欸挾飛雪至慘澹脫窮海猶濕蛟鼉氣把卷
闔且開所感溢文字羈孤老爲客任膝加淵墜但掃芥蒂
胸而活升斗惠島城亂雞鳴風雨一研置吾師長源儔妙
道綜情僞坐迷嚮往心根葉成飄棄子日接光塵分壇更
聯轡流聞激肺肝因緣藥疴瘵時危樂士賤千慮詎一試
仍將家人語志者氣之帥

雪夜感逝

死去親知併一哀帷鐙簷雪映徘徊等閒歌笑防追憶重
疊文書有此才萬古祇餘寒澈骨連宵翻教夢成灰仰天

侘僚誰相語斷續江湖白雁來

叔漈寄東游詩刊本書其後

掉頭一世不相能去喚三山旭日升的燦花光新寤寐鬱

盤海氣出觚稜客卿雜事收遺燼

黃公度有日本雜事詩二卷

顧問孤

吟切引繩

張季直有日本紀游詩

莫笑旁人與覘國幾擎肝肺對殘

鐙

除日東季詞

尋常頰唾在鄰牆擊缶傳杯索渴羌遮莫移家俛谿水便
成隔世換滄桑菜畦廬雪吟終好咀楊棲香意自長搔髮
又驚紛饋歲殘陽斷角立茫茫

又東梁壁元大令

猛從人海處，錐囊沒轍斜。街屹可望喧，寂但看鷗啄屋生。
涯自笑鼠搬糞，牽腸朋輩飢。堪念反手安危世，未詳往事
銷沈摩酒盞，空餘殘夢挂扶桑。

君去歲
游日本

除夕被酒奮筆寫所感

紀年三十日已除，兒童鵝鴨相喧呼。高燭照筵雜羹餅，被
酒突兀增長吁。國家大事識一二，今夕何夕能追摹。西
南寇盜累數載，出沒蹂躪驕負嵎。東盡黃海北嶺徼，蛟鯨
搏噬豺虎趨雌雄。彼此迄未決，發祥郡縣頻見屠。羣島萬
酋益黝我陰陽，開閩方齟齬。當今事勢豈不瞭，奈何餘氣

同屍居自頃五載號變法鹵莽竊剽滋矯誣中外拱手徇
故事朝暮三四給衆狙任蒿作柱亦已矣僵桃代李胡爲
乎宏綱鉅目那訾省限權立憲供擲掄何況疲癯塞鈞軸
囁嚅洩認別有圖剗肉補瘡利眉睫舉國顛倒從嬉娛公
然白日受賄賂韓愈所憤猶區區吾屬爲虜任公等神明
之胄嗟淪胥極念禹域數萬里久擲身命憑鞭驅朋興衆
說有由致欲掃歧異歸夷塗士民覆幕出至痛地方自治
營前模事急卽無萬一效終揭此義開羣愚歲時胸臆結
壘塊今我不吐誠非夫聞者慎勿嗤醉語點滴淚血霑衣

襦

終